

四庫全書

史部

欽定四庫全書

史部

福建通志卷三十

詳校官監察御史臣陳化龍

檢討臣德生覆勘

總校官檢討臣何思鈞

校對官中書臣高 中

謄錄監生臣吳 銓

欽定四庫全書

福建通志卷三十

名宦

興化府

唐

孔仲良

曲阜人 至聖四十一世孫敬宗寶曆五年以
儒林郎為莆田令有善政卒於官因家邑之涵

江

五代

賈郁

閩王審知時主簿秩滿為仙遊令正身奉法吏有以新果饋者郁曰若敢以此啗我耶及代去一吏

醉郁怒曰吾再任必懲之吏揚言公若再來猶造鐵船渡海後郁果再任時醉吏盜庫錢獄具郁署其牘

曰竊銅鑿以潤家非因鼓鑄造鐵船以渡海不假鑪錘遂抵法

宋

段鵬

京北人太平興國五年知興化縣加著作郎擢知興化軍會轉運使劉克讓以游洋轉輸不便請移

治於莆鵬覽視形勝以都巡檢一解為軍治建崇樓於軍治之前以鳴鼓角遷都巡檢一解於子城之西以便巡警建都監於軍治之東以勾稽兵馬諸公事雖勞民而不怨後論創始者稱段知軍云

黃禹錫

字仲元惠安人太平興國初以檢校水部郎中攝莆田縣事會游洋人林居齋據險倡亂函書

諷禹錫為援錫叱之潛遣長子觀乞兵於漕使楊克讓居裔聞之以計昇禹錫與其子置帳下詰以乞兵故欲殺之會觀兵至居裔力絀請降詔嘉禹錫尋請歸

薛奎

字宿藝絳州人雍熙三年以大理丞知莆田縣事請蠲南閩時賦魚埔草等稅民德之擢參政

李及

淳化五年以大理丞知軍事性清介為治簡嚴喜薦引下吏而樂道人之善

段全

泉州人咸平五年仙遊縣尉嘗遷學於縣南作孔子廟像據三禮圖作七十二子像

曹修古

字述之天聖末以御史言事忤旨出知興化軍再歲病卒貧不能歸士庶醮錢三十萬緡助喪

其女年十六哭帷中云我先人清節高天下不幸以直言謫死柰何以數萬緡污蟻之手卒拒不受詳建

寧人

物

劉諤

嘉祐中知興化軍創太平陂溉田萬餘頃世食其利按故興化縣有荻蘆溪流甚紆長諤址石溪流

堰而為陂仍作圳引而南注圳循山行咸用石砌遇山壑斷處復作砥柱駕石船而飛渡之其勢磬折蛇

行二十餘里及入境始分為上下圳士庶祀諤陂旁名其陂為太平陂

劉汝舟

政和三年調興化軍司法民有王姓者資饒病卒族輩利其財不以遺腹聞知軍欲籍其產汝

舟力爭之已而王妻生男復簿記其田宅授之知軍街甚汝舟急納告身歸後所生子名濟紹興中登第

詳建寧人物

詹時升

政和七年以朝奉大夫知軍事歲大旱時升自為位於麗譙之下袍笏立烈日中忽陰雲四合

大雨隨至

郭汝賢

浦城人宣和三年以奉議郎判興化軍事嘗擢軍家郡民舊決國清塘之水源濟木蘭陂所不

及至是湮塞汝賢盡力修治之

劉子翬

字彥冲崇安人建炎四年通判興化軍為政以勸民興行為先時逸寇楊勅犯閩子翬畫計備

禦寇不敢犯明年辭歸隱武夷山詳建寧人物

吳偉明

字元昭邵武人紹興初以朝散郎知興化軍政尚簡嚴民安之後奉祠歸

謝天民

字彥先建安人紹興十年以左承事郎知仙遊宣和末學舍鞠為草莽邑人陳可大修造未成

天民至勛復舊地以公帑二百萬緡佐之又置田三十五畝為修葺計

鄭昭叔

字顯仲寧德人紹興十三年以右通德郎知仙遊縣事為政必先自反時行經界法昭叔初得

戶部事目譜之未能盡曉僚吏佐史亟請施行昭叔曰已尚未曉何以使人乃開閣謝事覃思經旬復集同官商確數日然後定差保正長但取丁上產多人分為二等大者以備都副保正小者以備大保長各以紙籤畧姓名分置兩帖又分四類或物力高強或人丁衆盛或才智足任經畫或筋力可備走使各以其類置於一帖凡選一都一保必兼取四色人使之同事各盡所長民皆悅服相率就事差役既定然後以戶部事目給示所部親與解說立法大意散遣打量不過兩月他邑差役未定而仙遊已有次第矣朱熹守漳日嘗備錄

其說以示屬部

汪待舉

紹興中以左朝奉大夫知軍事性介直人不取干以私舊有船灣埔草等稅悉疏免之

周椿年

字春卿浦城人轉運使因之子紹興十六年以右通直郎知仙遊縣事歲饑民賴以活盜賊屏

跡囂訟者不得售

其奸號稱循良

趙不泯

宋宗室紹興中知仙遊縣時縣凋弊不泯悉更張之每去一弊輒壽之終日或累夕乃已不事

追呼鞭朴一縣大治或得其文移條教欲付梓人不泯曰此直空言要知寬猛先後惟所用耳

張允蹈

隆興元年以朝請大夫知軍事先是延建汀邵山寇起轉運使暫移本軍苗米二萬五百石輸

省會以佐軍興已遂沿為成例名猶刺米民不勝病允蹈狀於朝彌其半

鍾離松

淮東人乾道三年以朝請郎知軍事先是知軍張允蹈奏除本軍猶剩米之半松至即奏言興

化歲入纔及省會十二分之一豈容寢寡益多以紕民力疏入詔盡除之

趙綢

字仲鎮乾道四年以左奉議郎知仙遊縣事修治學校增廣學田三百餘畝以充學廩

潘時 字德鄰金華人乾道九年以朝請大夫知軍事嘗

秦蜀紹興時經總二制虛額錢若干萬又築洋城

陳壩二陡門以疏水悲民德之

姚康朝

字廷賓吳興人淳熙三年以朝奉大夫知軍事為政寬猛適宜諸生告以貢院無定所康朝為

相地改建於軍治之西

楊獬

淳熙中知莆田朱熹嘗涉其境謂獬之政事可觀士民交口誦之乃文學士非俗吏也

張淵

淳熙十五年以朝請郎知軍事嘗創涵江陡門以蓄延壽里諸水民便之

趙彥勵

字懋訓浚水人紹熙元年以朝奉大夫知軍事曾雨水傷稼故事三縣課夏稅錢幾二萬緡又

額徵僧道錢幾七千緡彥勵請以贏錢代民輸稅又乞汰雜調舊額詔從之復奏蠲僧道免丁錢以修軍

學取廢剝田
以贍學廩

何紘

字文伯永嘉人慶元二年知軍事才敏給為政審
先後奴隸走卒各得其所嘗作人物志創平潭橋

新桂
籍堂

王孝遵

慶元五年判興化軍時軍學弟子員日衆而歲
屢不登庖廚告匱孝遵攝軍以廢剝田一頃有

奇給
之

陳仲微

字致廣高安人慶元五年以進士調莆田縣尉
嘗攝縣事會歲大祲軍卒挾饑民為變仲微戮

其首謀數人餘置弗問性抗直有以尺牘達者不開
紙還之寺僧與軍學爭水利仲微竟歸之學僧憤書
其事於鐘朝夕考擊詛呪一日仲微偶
過寺見之嘆曰吾何心哉質明僧暴卒

王居安

字資世黃巖人開禧中以司農丞知軍事條奏便民行經界法以均賦役又言番船往來貿易

有損無益宜禁止嘗念書生餽廩不給以廢剝田一十頃充之又通商賈以平米價擒劇盜以安平民

葉文炳

浦城人少從朱熹學嘉定四年知仙遊縣事持已以敬臨民以寬藹然考亭家法

吳炎

字濟之邵武人嘉定七年知興化軍時當賓興大典炎命樂工按古音譜歌鹿鳴之詩以饗之營築

蘆浦陡門及創軍學晝書會時稱之曰儒吏

陳彭壽

天台人嘉定中知莆田廉介明勁鉅擊橫暴撫摩良善不遺餘力郡人祀之大乾廟之右廡

王克恭

南安人寶慶三年以工部郎知軍事會汀邵寇作卻人直秘閣陳宏家居倡議築城克恭捐廢

剝錢數萬緡佐之

曾用虎

字君遇晉江人紹定五年知軍事立平糶倉捐楮幣萬餘緡為糶本民賴焉莆舊未有城用虎

始築軍城延袤七里有奇既竣下令蠲是年夏稅之半而以搏節贏金輸之又重修太平陂悉易以石人

更其名曰

會公陂

楊夢信

廬陵人紹定六年由國子監丞知軍事嘗捐幣錢六十萬贖學田之入於巨室者以贍士

張友

毘陵人嘉熙二年以直秘閣知軍事嘗謂莆地褊小賦入不敵江浙一大戶而魁人韻士居多出金

錢二十萬以贍學費割廢剝田租三百斛以佐學廩又以搏節錢二千緡修十三齋諸生肖像祀之

凌景陽

仙遊縣尉嘗出郊有道士挾二童子至景陽見其眉目殊秀問為誰曰農家子蔡襄蔡高也景

陽令其至官廨躬教以經秩滿攜至郡囑太守置於郡學後襄高擢第通顯實自景陽啓之

蔡次傅

字巖肖泉州人淳祐五年以宣教郎知仙遊縣
雷為政先後興學校作士氣增學廩勸農桑民

深懷
之

楊棟

字元極青城人淳祐十年以編修知軍事先是
至聖裔有居涵江者棟為建廟闢田創置書院聚

子姓肄業其中特立先聖後戶籍以別齊民後知
福州亦著政績賈似道欲收時望嘗論薦之會彗星

出棟陰請上逐似道似道

覺被劾去互見福州名宦

趙與泌

宋宗室處已儉樸宛如韋布寶祐間知仙遊縣
以敦本明倫為教嘗作勸孝歌以訓民民有母

子相訟者與泌灑泣出
孝經口授之皆改悔

祝洙

崇安人景定八年為涵江書院山長知軍徐直諒
薦洙於朝云趨向不凡學問有本洙祖姑為朱熹

之母而其父穆嘗

從熹於雲谷云

汪元春

字景新奉化人咸淳二年以宗正博士知興化軍事妻子不之官却例錢不受每食蔬飯一盂

事至即面歟而立決之甫二月卒民以金助喪其子弟恐汙元春不受

張日中

景炎二年判興化軍起兵應文天祥兵敗死之

元

郭托爾

皇慶元年為興化總管創萬金陡門引木蘭陂水東北溉北洋田萬餘頃

張仲儀

燕人延祐二年為興化路總管識達治體初總管郭多爾創萬金陡門遷秩而功未遂仲儀益

開山浚河引繞郡城以北重造通濟橋於木蘭陂砌蘆浦陳壩二斗門以殺水勢莆人謂多爾善創仲儀

終善

蔡真

延祐中知興化縣德政及人士民刻石頌之其畧曰蔡侯作宰號稱神明不貪以昧如壺貯水不反

以側如衡斯平田野以闢學校以興盜賊以息獄訟以清

吳厚

字德載九江人泰寧間知興化縣政治有聲去之日邑民思之有前蔡後吳之謠

葉衡

字仲輿德興人至元三年知興化縣撫民如子為政有方及去民立石頌之

烏克遜澤

字潤甫臨潢人至元十六年總管興化路先是澤從索多攻臨興化索多下令屠城澤說

索多開南門縱民脫去全活甚衆及莅任民喜曰是吾再生父母也乃下掩骼之令招集流亡置慈幼院收育道旁棄兒期年大興學校召長老率諸生講經肆業行鄉飲酒禮他郡聞而慕之郡人以澤與常袞

方儀并肖像

祀於學宮

李約

字宙初廬陵人至正中為興化經歷會仙遊有陳一壺之變檄約往捕約至縛壺置法他無所問縣

境帖

然

盧端智

毘陵人進士時哈都為總管以端智佐理端智嘗告部使者盡復學田又築南箕埭歲收租四

百斛一時

學徒以裕

趙文煥

字有章真定人至正中興化縣主簿時有偽稱百戶巡鹽者縣中騷擾文煥按之遂伏辜

明

蓋天麟

洪武初知興化府事時天下甫定議改置官署天麟移府治於縣廳而以衛轄徙居其地修廟

樂雜米古儀禮定四配十哲位飾
兩廡像齋舍饌堂樂器井井悉具

董仁中

金華人洪武十一年知莆田鞭朴不施吏民悅
服卒於官貧不能歸士庶相與營葬於北郊之

西劉山

顧思敬

崇德人洪武十一年知仙遊時歲歉民不
能自存思敬罄資費易穀賑之民賴以全

李春

字崇義榮澤人洪武十三年知興化府時展築郡
城春均賦受役民以不擾西湖陡門及陂堰修治

之費咸撙節贏金為之後以疾卒
民請衣冠塋於城南之篠塘山

尉遲潤

翠昌人洪武中判興化以公勤清白著嘗
奉檄覆勘泉漳戶口田糧審覈不煩而理

周宗燧

字景炎天台人永樂二年由行人知興化府時
銜卒凌脅有司宗燧不為屈有悍卒與民爭道

肆虐宗燧以法繩之

帥數為之請不少貸

楊武

曲沃人永樂四年知興化縣歲輸平海衛糧民苦之武狀列利害於當事得改輸本府

董彬

字文質廣平人永樂十一年興化通判甫視事父老詣府言木蘭陂壞彬單車往視召匠授事陂得

不壞

李至剛

華亭人永樂二十二年由禮部尚書左遷知興化府留意文事不屑簿書人以卧治稱之

王彝

字友倫四明人宣德八年知仙遊縣先是民困賦役逋亡者衆彝勞心招撫奏免小窳寨弓兵均徭

亭驛勻編莆田五里助驛別辨科徵以均稅糧民力漸紓營建縣治學宮壇壝倉庫道路無不畢舉甫三

載卒於官邑

人哀慕之

張恂

字愿夫南昌人宣德九年補仙遊教諭始至即按學制嚴條約以身先之雖祁寒暑雨必具服與諸

生同食饌堂咸有節度課

業務根經義不事浮文

劉忠

字良弼京口人正統四年興化同知時延平山寇起命大將軍往討道出於興征卒市魚烹之蛆見

遂大譟執市魚者誣以蠱毒帥不問軌行軍法忠亟排輓語之曰此魚腹中所產非蛆也急取啗之帥悟

而止

葉叔文

湖州人正統間為莆邑丞時木蘭陂壞檄叔文修治極力營造各易以石南北溝洫洋城林墩

蘆浦諸陡門歲以次重新

潘本愚

字克明博羅人天順元年以給事中知郡事值荒旱為民請減稅十之四復陳民情十二事並

見施行郡中富室出息質人田久之賦寄空籍官按
徵質田者代輸而富室倖免本愚下令富室輸稅在
任廉正公直興學厚民

後改漳郡亦以能稱

岳正

字季方灤縣人成化戊辰進士第一為石亨曹欽
所陷由文淵閣請知興化府嘗建涵江書院及

宣聖廟鑄祭器又毀淫祠作小西湖開兼濟河掾白
故事例具文以報正曰此吾事何須煩使者代乃公
畫也所著

有類博稿

潘琴

字舜絃景寧人成化八年知興化府會閩瑞下泉
漳索海物氣張甚琴不為屈初至首建社學廢淫

祠又嘗汰學宮所祀鄉賢之冒濫者每聽訟端坐不
言兩造爭直一言折之有神明之號後入覲力引疾
去

王弼

字存敬黃巖人弘治三年知興化府時漳寇焚劫鄰封巡海副使馬壘檄調興化衛丁壯討之弼詣

語曰衛多羸卒可守城摠壘而已如檄去萬一賊鼓行而南是以城予敵也守知有城耳壘聽其語賊亦

尋平

翁理

饒平人弘治三年興化推官時有鎮守太監入興攜二白鶴頸上懸牌為民間犬吠覺遂屬之理

判云鶴雖懸牌犬不識字禽獸相殘於人何事人服其不撓

吳遠

字惟明徽人弘治中以進士知莆田值歲祲多盜遠至課農桑固封守賑民之急盜悉為良暇日程

試弟子員親為授業凡學舍橋梁郵館皆治以母憂去任終黎平知府

張嶺

蕭山人正德四年知興化府有聲以忤劉瑾勒致仕去後瑾伏誅嶺復起至工部尚書

張琦

字君玉郟縣人正德十年知興化府為治尚清靜數與少保林俊往來賡和所著有白齋集

馮馴

字行健岳池人正德十一年知興化府政尚威嚴時奸民樹黨挾睚眦中人馴以計釣致悉按之法

草寇恟懾其威遂各散去後擢本省右布政

雷應龍

字孟升上元人正德中知青田有鴛子輸稅者應龍出俸贖還且痛自引咎曰乃公獨不能作

陽城俾民至此哉旁縣偶以使者符勾稽至輒咄咄受成去曰無持布鼓過雷門也尋召入為御史

蔡宗充

字希淵山陰人正德丁丑進士授府學教授會御史行部謁學廟故事教官率弟子負長跽櫛

星門南宗充令諸生列立而自稍磬折於道旁御史目攝之不為動已而登明倫堂宗充復長揖請遵令甲得陪席聽講御史叱之曰豎儒安省令甲宗充退即辭廟去後為四川督學僉事

蕭弘魯

字晉明廬陵人正德十五年以舉人知仙遊留意庠序勸書院置學田再歲山寇猝至調畫戰

守賊遁去奏請寺田給貧士膏火及民壯工食以固城圍民始得甦擢知儋州

蘇廖鎔

字大器雷州人正德十六年任仙遊典史嘉靖癸未寇薄仙城廖鎔率兵往禦寇不敢近後覲

卒於京喪歸士民哀誄立碑道左仍塑像祀之

朱袞

字朝章上虞人嘉靖三年知興化府有詩才善書每有勝論輒據案書之一時傳誦

黃一道

字唯夫揭陽人嘉靖十三年知興化府嘗修寧海橋海堤為功最鉅

雷禮

字必進豐城人嘉靖十三年興化推官博雅多文好獎引士類嘗署仙遊篆平反疑獄老吏不如以

去 艱

何鯉 廣東化州人嘉靖中授平海教授先是師生俸糧取給軍儲疏請建倉於學學有倉自鯉始

周大禮

字子和崑山人嘉靖二十一年知興化府時郭外盜牛甚夥而屠兒陰為根抵大禮集諸屠兒

與約若等三入吾禁定引鴆自裁已而獲犯者立斃之於是羣盜解散常發帑錢數千緡糴粟以濟饑民

全活無數又置公田於游洋至今人呼周公洋云

葉巨卿

字弼甫舒城人平海衛後所副千戶嘉靖二十二年持檄領水軍守泥滬灣巡徽南日寨會倭

艦數十至巨卿迎風鏖戰生擒百餘人次年賊颶風夜半入劫巨卿堅壁捍禦遲明勒所部與賊力戰身

被數十創死又興化衛千戶魯師亮壬戌倭寇陷城亦奮勇死陣中巡撫上其功詔各增秩立廟巨卿子

煥然癸亥賊攻城亦戰死

白仁

字道顯涿州人世襲興化衛中所千戶嘉靖二十三年海寇猝至仁奉檄領水軍追至連盤四灣與

指揮丁全並力奮擊生擒十四人踰年寇屯福清海口仁率部兵犯賊鋒列柵柳尾嚴陣以待他將皆頓兵依險自保仁刺血矢衆夜出巡徼遲明復陣於東嶽廟口方蓐食賊從間道至仁短兵接戰兵寡無援被重創而死事聞贈明威將軍命有司廟祀之子孫世襲指揮僉事

沈盤

字大新秀水人嘉靖二十四年以進士授興化推官嘗從巡按御史行部所至有疑獄御史授指鑿

引援刑書不妄附會有誣誤者輒釋之後知府事以憂去士庶送之境外灑涕為別

丘珍

字若寶祥符人世襲平海衛千戶嘉靖三十四年倭寇數十艘循海岸焚劫珍率所部為游兵扼其

要害使不得傳岸賊怒焚舟潛從白湖江登岸珍令數卒乘夜繩城從間道鳴金鼓大呼曰寇至寇至於

是人始知竄匿平明珍以輕騎數百追至海口奮力死戰墜馬被槊死詔嘉其忠贈秩立廟

陳大有

南海人嘉靖四十二年知仙遊時倭寇乘破莆餘焰圍仙城民驚思遁大有諭曰吾誓與此城

存亡若衆敢純垣者斬於是賑窮乏分部伍簡精銳為游兵晝夜巡緝防禦間絕死士乘賊怠而斫其營相持五十餘日而叅將戚繼光援至城賴以全

莫天賦

字子翼海康人嘉靖四十二年知莆田時倭難甫定民多竄食異地天賦撫字招徠復業幕官

藉捕盜波及無辜天賦白府禁之手自書牒責其墨狀皆斂手相誠諸生當亂後苦無衣乃各予冠服金遍給農家牛種擢南京刑部主事繼其任者姚江徐執策操勵亦堅人為之誥曰難教明月莫去却喜清風徐來

汝良

嘉靖初莆田典史時山寇猝至良督兵往捕奮勇射賊中流矢死

王翥

字九達泰和人嘗與鄒守益羅洪先講學嘉靖中授莆田教諭督學朱衡開講堂於鳳山梅峯水南

涵江令翥主之歿後及門私謚為貞穆先生

易道談

字進明巴陵人嘉靖四十二年知興化府倭變後嘗撤廢剝材以繕城樓復葺築羅城又條罷

夫保館夫二役自署牘尾曰後復以故事請者輒有天譴尋擢本省副使以監軍行縣父老遮道曰此吾使君也吾屬數苦游兵投宿今無患矣

歐陽深

南安人唐歐陽四門之後為郡諸生慷慨好苑士樂為用嘉靖丁巳以後閩數被倭患深結死

士破走之以納級除泉州衛指揮僉事屢平寇思備蘇光祚施大福等寇論功進行都司事倭破興化城

掠金帛子女軍府檄深應授與賊戰於東蕭斬首百餘級乘勝進搗賊授者衆與部士薛天申周岳鎮等血戰皆死之事聞立

祠歲祀錄其子孫

葉承遇

字思章永嘉人萬歷五年知肯田先是田分官民賦有輕重承遇欲均田為一私念浮糧難攤

會有履畝之命即以丈出餘田折補其額於是一則法行閭里便之又編派里甲悉為更定即豪貴無所避至今談均田均役者必首稱承遇云

祝致和

字達卿龍游人萬歷九年興化推官風采屹然望若神明兩署篆事皆大治秩滿擢刑部主事

鄭思道

永嘉人萬歷十年為興化衛經歷衛轄五所凡給支月糧例有用印錢思道概却不受或奉公

檄檢勘屯田第驅羸馬縱轡而行一軍伴裹糧隨之歷九載清苦一轍擢德州同知

范梅

豐城人萬歷十五年知興化府沈毅有特操愛民禮士每蒞學進師生講論經旨而以率俗明倫培

養氣節為諄諄郡常泉漳孔道輪蹄絡繹梅乃中馳傳之禁得所節縮郵金千餘故事解府備他費梅叱曰柰何令帑有羨金而更剝吾民耶輒上請以所羨當歲額之入得減是歲驛傳如其數云

董綾

瓊州人萬歷二十一年以選貢任郡判凡徵收倉糧必躬閱量概胥役無所容奸嘗攝篆候官勾稅

皆以清慎著銓曹嘗署其
膺一塵不染三市足稱

李大欽

字惟敬浮梁人萬歷二十六年知興化府凡有鈎捕惟令鄉約長持牒至則立訊庭無留獄分

守徐即登建明宗書院大欽捐俸成之
月定課期親校諸生文體為之一變

孫養正

字聖功吳江人萬歷三十四年推官嘗署善惡二籍朔望令保甲條報備書其上故訊獄多得

情

徐觀復

上虞人萬歷四十一年以進士知仙遊稔知仙邑食鹽之苦以龍華寺廢租抵輸鹽課民得食

鹽之利秩未滿調去民立祠祀之

林敦忠

字恕甫晉江人萬歷間任興化教授恬澹簡和勤於課士郡中廩庠念師席獨冷奉膳金之半

為修脯敦忠不取士敬愛之祀於名宦

吳麟徵

字來皇海鹽人天啓中以江西推官補任值誕日有以錦障賀者立取焚之自是莫敢干以私

獄訟冤滯多所平反嘗自題署中云幽蘭含古意香荔見丹心未幾擢吏科給事中晉太常甲申殉難

祁彪佳

字幼文山陰人天啓末興化推官遇事明敏讞獄多得情後擢南京御史莆瀕海漁戶有失風

源泊者汎弁以得賊報彪佳詰其音即論曰吾莅莆久極知莆民之良釋而遣之

吳彥芳

字延祖錢塘人天啓末知莆田遇事守正士民德之會巡撫熊文燦行部怒彥芳遣吏挾去通

郡數千人馳至蒜嶺列彥芳善政乞還任導以綵旌鼓樂名聞京師擢四川道御史

金濛

字澗如崇德人崇禎十四年進士知莆田甫下車極意作人多成名士催科設立條款不事追呼除

大蚶山賊首陳露等民賴以安國朝康熙間濛姪臯謝字應台以戊辰進士知莆田設便民單自繳籤勸民輸課歲省金錢無算捐俸重建縣堂整學廟修縣志與濛實相後先云

國朝

黎樹聲

字仲寶烏程人丁卯舉人任福州司李署興化府篆海寇破城樹聲不屈遂遇害事聞賜祭

葬 贈按察

使 廕一子

陳有虞

字嗣韶陝西富平人順治十年以進士知仙遊十二年海寇迫城有虞嚴督守禦夜遣鄉壯絕

城擊賊明年圍益急援兵不至賊穿地入城遂陷有虞單騎巷戰身被重創至城西廣橋馬蹶仆橋側死

張彥珩

字九如洛陽人丙戌進士順治十一年知興化甫下車會征南禁旅臨郡歲且大饑彥珩繪流

民圖進之發粟為糜以賑饑者民思之不衰

蘇弘祖

字光啓遼東人順治十二年參政閩藩駐興化禦寇修城興學養士設倉賑濟莆人頌之擢副

都御史巡撫南贛所著有經世名言諸書行世

史允琦

字奇玉江寧人丁亥進士順治十六年興化推官性明決吏不敢以身扞文網鞠獄多平反

趙世安

字惟康，鑲紅旗人。康熙二十七年，由仁和知縣擢興化同知。嚴毅多幹畧，尤嚴賭博。凡僇捕之

戲，有偵得之，雖紉袴子弟，必重懲示儆。又即罰鍰之錢，重修木蘭陂。後攝詔安篆，卒於官。

曹泰曾

上海人。康熙戊子，以舉人授莆田令。邑有游洋周公田租及官地房稅，有徵無解者，悉請當事

以瞻學田故事。凡有田地拋荒，人經故絕，其賦責之。圖甲或親族名曰勻攤。泰曾援江蘇事例，將報墾之田，以次抵豁。使國課不虧，民生無累。又精獄訟，有數年不決者，輒為剖判去官。之日，行李蕭然。

泉州府

隋

歐陽祐

洛陽人。為泉州守，義寧二年任滿西歸。至郟陽，聞隋亡，挈家自沈。死，土人殮葬之，立祠以祀。

唐

許天正

因始人陳元光前鋒將也博學能文長于訓練元光藉其力平惠潮虔撫諸寇三年內嶺海肅

清陞中奉大夫兼嶺南團練副使裴採訪張燕公薦掌史館天正力辭歷泉州潮團練副使民廟祀之宋時

追封順

應侯

薛昱

天寶中為清源太守以清德著郡人歌云郡號清源官有清德

蘇妙

字觀妙南海人大厯中刺泉州有惠政時有白鵲來巢行春門樓妙每出鵲飛集車蓋上泉民歌頌

之

姜公輔

日南人建中間為宰相論唐安公主造塔忤德宗貶泉州別駕因築室於南安九日山與秦系

遊

趙昌

字洪祚天水人貞元間刺泉州鑿塘水灌田三百餘頃後入為尚書民追思其德名曰尚書塘

席相

安定人貞元間刺泉州拔歐陽詹等八人將薦之闕下為設讌東湖亭修賓主禮款洽備至

馬總

字元會扶風人貞元中請泉州別駕元和初為泉州刺史鑿北山下塘以灌民田篤學不妄交遊雖

吏事倥偬手不釋卷以儒術飾

吏治歷官戶部尚書謚曰懿

趙祭

太和中自康州刺史移刺泉州即郡東南隅瀦洩江水溉南洋田萬餘頃民食其利

五代

詹敦仁

字君澤固始人後周顯德初隱於仙遊植德山下闢王畧命參決軍事強以袍笏不受以詩謝

之有周粟縱榮寧忍食葛盧頻顧謾勞思之句後南
唐節度使留從効辟至復力辭乃求監小溪場請置
縣今安溪縣即其地也政尚德惠因舉王直道自
代卜築佛耳山顏其堂曰清隱人稱為清隱先生

宋

喬維岳

字伯周太平興國間以通判知軍州事時盜起
仙遊衆十餘萬攻郡城城中兵僅三千勢危急

監軍何承矩欲屠其民焚府庫以去維岳抗議堅守
既而轉運使楊克讓率兵至圍解事聞遷權知軍州
事

韓國華

字光弼安陽人魏忠獻公琦之父也太平興國
初進士景德中以太常少卿出知泉州生琦於

官舍後卻人石刻國華及琦像
祀府中而命府治之堂曰忠獻

陳執中

字昭譽大中祥符間知惠安縣清謹守法門無私謁嘗有縣齋咏梅詩一首云去年邊上見梅

花醉眼淹留未到家今日嶺南攀折得忽驚身又在天涯後人因作見梅亭以記

方慎言

字應之莆田人天聖初知泉州會歲饑大發官廩賑貸於鰥寡孤獨尤加恤焉民間生子多有

以方兒為名者

李畋

蜀人天聖初以大理寺丞知惠安政務休息初張諫知益州遜畋於諸生中授以文學後遂知名其

母賢而知書且精相宅時在惠安謂白虎山高不利於人命築城隍廟於治東以壯青龍之勢至今利賴之

沈周

字望之錢塘人康定中自潤州移刺泉州廉靜中和治尚簡易民有訟者使退而思過皆自解去先

是泉多盜前守令民蚤休市閉門
周至除其令以便民盜亦自息

蔡襄

字君謨仙遊人至和嘉祐間兩
知泉州有惠政詳興化府人物

晁宗恪

字世恭祥符人熙寧中以光祿卿出知泉州修
弛廢戢強橫威信大行盜不敢發獄無繫囚民

習其政去
而思之

黃仲

邵武人嘉祐間進士知泉
州建學校芝生於梁上

陳樞

字慎之湖州人熙寧中以尚書屯田員外郎知州
事敦樸平易慎刑減役有所徵發與民期會未嘗

取疾爭先值歲凶樞分遣坊舖止窮民流散饑者給
食病者給藥全活無算元豐元年曾鞏守福州充兵
馬鈐轄疏樞治狀特遷尚書都官
員外郎誥曰吾寵樞也以戒奔競

危雍

卽武人皇祐五年進士熙寧間知晉江縣嘗築烟浦埭以捍海潮蓄灌既又築清洋陂自南安九溪

至高溪凡三十六派合流而下灌

田四千八百頃民至今食其德

黃琮

字子方莆田人進士元符間知同安縣清操不渝有惠政及民時與陳麟翁谷稱為三循吏

趙鼎

字元鎮聞喜人崇寧五年進士紹興間以叅知政事出守紹興秦檜往餞鼎不為禮檜銜之徙治泉

州安撫泉民甚德之後竟為檜所陷不食而死

朱熹

紹興中任同安簿益民以教養為先時從學者衆乃建經史閣作教思堂日與講論正學詳建寧人

物

游酢

字定夫建陽人判泉州以勤治事詳建寧人物

楊幹 廣信人 紹興間知安溪縣為政以厚俗為本崇尚教化邑之文風至是始盛士民立祠祀之有心正

而清月瑩
冰壺之頌

傅知柔

仙遊人 紹興中判泉州治有能聲帥
臣檄捕海寇賊望見知柔幟即降

劉子羽

字彥修 崇安人 紹興間知泉州多
惠政民愛之如父母 詳建寧人物

陳康伯

字長卿 弋陽人 紹興間知泉州時海寇間作朝
廷遣劉寶成閔逐捕康伯宣朝廷德意招懷之
盜多降籍為兵久之不逞者復陰倡亂為訊其竇論
殺之州以無事後歷尚書右僕射同中書門下平章

事

葉廷珪

字嗣忠 甌寧人 紹興間以兵部郎出知泉州為
政清靜簡易時通淮河塞為疏引入城語州之

人士曰通此巽水十年當出大魁至期梁克家
應之尤工詩喜編纂有海錄雜事碎事傳於世

趙令衿

宋宗室紹興間知泉州博學能文莅郡留心教
養嘗建堂祀姜公輔秦系於九日山下民感其

化

辛次膺

萊州人紹興間為吏部郎以劾秦檜妻兄王仲
巖等不法罷官檜死起知泉州為政清靜務先

德化民
安之

范如圭

字伯遠建陽人紹興間知泉州時南外宗正官
寄治郡中挾勢為暴占役禁兵以百數如圭裁

之以法宗室沮恨遂寤
譜之罷官詳建寧人物

彭元達

長樂人大觀三年進士紹興間知惠安縣值兵
革後民俗凋敝為講求利病軍需百費調度有

方邑不驚擾及去民為
肖像於學之東廡以祀

石敦

字子重臨海人進士紹興間以桂陽簿調同安縣丞會歲旱民飢縣白府蠲租太守怒檄敦杖其主

吏敦移書太守曰杖一吏細事耳民皇皇無以為命縱不能救忍符其口乎守遣人案驗與爭益力部使者聞之竟委使視焉敦歸即諭民蠲者什九且亟召鄉吏閉廨中列所蠲與當輸之數使為一榜立授里胥走揭其所矯曰上官意也遂定初敦與朱熹友善歿為銘其墓

陳俊卿

字應求莆田人隆興初以寶文閣待制知泉州初俊卿為州觀察推官服勤職業同僚宴集恒

謝不往秦檜惡其不附已貶教授詳興化人物

趙子浦

乾道初知泉州吏有掠民女為妾者其妻妬悍磔之貯以缶馳寄其兄興化掾廨中妾父詣郡

訢吏不能決于瀟廉知其事密令人往興化掩取之果得缶遂成獄

王十朋

字龜齡樂清人由太學廷試第一乾道間知泉州嘗劄劄以創貢闈朔望見諸生學宮從容誨

誘士之賢者踵門禮致之民輸租俾自概量每聽訟温言而曉以義理多退聽者朱熹稱其疎暢洞達如青天白日為磊落君子去之日老解攀留州人為建梅溪祠以祀之

汪大猷

字仲嘉鄞人乾道中以敷文閣待制知泉州海蠻毗舍邪掠近海大猷創巡舖二百區屯戍烽

烟以息會真臘大賈入境戍兵以為毗舍邪復至執之大猷曰毗舍邪面目漆黑語言不通此豈是耶遂遣之三佛齊國請鑄銅萬觔守臣將督造付之大猷奏銅不下海中國方禁銷銅柰何為外島所役卒不與進敷文閣直學士留知泉州

丁康臣

乾道間知惠安縣有善政王十朋署其考曰獄訟詳明民無冤抑催科不擾辦居衆先付以繁

難必可

倚仗

趙必愿

淳熙間知泉州罷白土課及免差吏權鐵諷諸邑行義役秋旱力講荒政乞發倉賑救全活甚

多

林枏

莆田人淳熙間知泉州訟獄盈庭剖決不滯立除諸色無名科斂豪強斂跡

蕭里

字元舉龍溪人力學好古以周禮名家慶元間進士調同安尉一介不取當時有嗜學如飢赴義如

渴之

稱

謝諤

字昌國新喻人慶元中以煥章閣學士知泉州所著聖學淵源五卷孝史五十卷詔付秘書省

倪思

歸安人嘉泰間知泉州嘗浚河渠造橋梁葺候館立養濟院百廢具興及卒民祠祀真德秀為撰祠

記以比蔡襄

王十朋云

鄒應龍

字景初泰寧人嘉定間知泉州郡城故卑薄為請於朝而大修之城始固德濟門外筍江下流

舊止舟渡應龍至始造石橋長一百五十餘丈翼以扶欄居民行旅稱便

真德秀

浦城人嘉定間知泉州民未輸租令自概量聽訟止揭姓名示朗人自詣聽治自卯至申敦諭

未已或勸其安養精神德秀謂無以惠民僅有政平訟理市常勉耳值海寇作亂官軍敗衄親授士卒方

略擒之紹定中再知州事迎者塞路深村百歲老人亦扶杖以出歡聲雷動詳建寧人物

方阜鳴

字子默莆田人嘉定間任泉州簽判時真德秀為守阜鳴嘗謂減門刺史破家縣令此衰世事

古人惟曰宣弟君子民之
父母而已德秀深歎服焉

宋鈞

莆田人嘉定間知泉州先是州有銀礦令以其銀
代台信卻建四州上供以四州所產綱綿絹帛折

還支給官兵後礦閉廢四州所折還皆純惡且多積
欠大為民病鈞遂懇奏乞從初賦從之為蠲逋負講
荒政所全活萬計德秀後代
守郡者鈞人謂善繼其政

陳宓

字師復俊卿子嘉定間知安溪縣先是縣有稅課
錢名經總制錢為民病時府判監簿復欲解補登

足宓以為酷政虐民持不肯應至各色錢不係上供
者例歸縣吏以例進宓曰此一例字壞了多少賢士
大夫命置官帑
詳興化人物

胡大正

字伯誠崇安人開禧間任泉州簽判會劇賊過
海龍羅動天者犯清漳泉城戒嚴近郊有持斧

來者數十人兵捕以聞同幕欲榜殺城下大正不肯
訊之皆採樵者亟釋之郡為商賈之衝每海舶至檢
視之得利不肯大
正秋毫無所取

徐鹿卿

字德夫豐城人嘉定中進士紹定間知南安縣
首罷無名之賦明版籍革預借決壅滯達冤抑

邑以大治真德秀帥閩疏其政以勸列邑後累遷禮
部侍郎所著有泉谷文集奏議講議鹽楮議稿歷官

對越集手編漢唐文類

文苑菁華卒諡清正

鄭鼎新

字仲實仙遊人紹定間進士知晉江縣建問政
堂輯論語繫於政事者二十四章書於壁間以

時儆省又建縣學闢尊道

堂民為立祠於紫澤宮

王大壽

晉江人紹定間為左翼隊將會海寇犯圍頭
壽領卒百人防遏寇賊十餘人竟以無援死

元

呂桂

字文桂祖謙曾孫其先金華人徙居武夷至元間以薦舉任劍浦教諭遷知安溪縣節財愛民胥吏

無所售其奸人謂其不負家學

唐光善

似祖元貞中任惠汀等縣都監使至元間辟知安溪縣以清白著子

雷機

字子樞建安人至元間進士調知惠安縣節浮冗抑豪強賦役均平人無嗟怨陞湖廣提舉詳建寧

物人

瑪哈穆特沙

字端甫鄂勒琿人至元間任同安達噶噶齊甫至聞安溪番寇破城立砌以石明年春寇

復來攻遂分兵三屯以拒賊潰去泉寇伊宗禮
滿聚攻城沙梟其逆黨力戰走之擢本州判官

僕玉立

字世玉金吾人至正中監泉州時當兵亂玉立築城浚河為捍禦計興學賑貧政蹟尤多

龔名安

晉江人至正中為泗州場司令會西域納古納等竊據泉州福建行中書省興師討之因檄名

安募兵海濱與官軍合兵並進
遂執那兀納名安之功居多

陳駘

至正中以學行為潯溪場司丞時鹽法廢壞私販盛行頑民相挺易於為亂駘招捕之海濱以安

孔公俊

字師道至聖五十三世孫至正間任同安達魯噶齊有政績嘗建大同書院於學宮之東以

祀朱熹

張夔

至正間南安縣尹甫下車父老庭請謂邑水失道不時害稼遂捐俸倡修闢湮決室旱潦無虞

劉益

晉江人至正間以軍功授晉江尉會西域納古納等據泉炮烙郡民酷取財貨益設法贖之所活甚

衆

林廣發

龍溪人至正中授安溪縣教諭會寇作奉府檄
招降以勞遷本縣主簿仍叅謀軍府事每俘至

委訊輒多伸雪自是
井里被俘皆獲免

鷓瑪台

字景春蒙古人至正末以延平路總管監南安
邑當寇亂調度轉輸以給軍餉勞徠綏輯以復

流亡時

稱良吏

雷燦

字景星建安人至正間領浙江鄉薦任
泉州路塗嶺巡檢寇起舉義兵死之

明

胡器

字士璉新喻人洪武間練子寧薦其賢擢知泉州
始至官革蠹弊課農桑興學校修橋渡時令父老

各誨其子弟每判死刑輒鬱鬱不樂曰吾不能化民故致此會倉庫火風猛莫遏器向風稽首火遂滅有士劉孔宗當編伍試其文竒之送補郡庠未樂中成進士泉科第之盛自器作養始陞青州按察使

洪祿

字子厚杭州人洪武間通判泉州居官廉謹性尤謙退遇名儒賢士必折節講論扶弱恤下如恐不

及

安景賢

三河人洪武間知惠安縣剛毅果斷判決無滯民頌之曰安公莅止視民如子不怠不荒為邑

之主

顏賢

高安人洪武間以茂才授泉州司獄有郡人翁彥立繫獄通判胡釗以私憾授意命囊沙壓之賢正

色曰彼罪不至斯不敢聞命興化卓六秀與其黨八人坐罪入獄爰書未定一夕獄旁火發守欲坐以反

獄盡殺之賢力拒曰囚非反獄豈可厚
誣况獄猶未成柰何殺之守慚而止

陳永年

新淦人洪武間知惠安縣嘗患螟蝗永年為
禱於城隍翼日鶴鵠蔽空而下啄食之歲且大

登

楊榮

代州人永樂間惠安縣典史性剛直常以清
操自勵處貧窶澹如也令陳永年薦之於朝

余慶

字原善新會人永樂中知南安縣甫下車立除奸
弊學校縣治一一參理邑有海蕩被水衝決浮糧

一千二百餘石里民歲負賸累慶為奏免流
亡悉復尋擢去邑民號泣攀轅者數百里

蔡錫

字廷予鄞縣人永樂舉人知泉州廉慎勤敏奏除
洛陽東山大橋三鎮戍兵公私便之洛陽橋圮石

有刻文云石摧頽蔡再來錫因
捐俸修之民以祀於蔡襄祠畔

閉積

積州人宣德間惠安縣主簿有善政以邑民丐留遂擢知本縣莅任既久情偽利弊纖悉周知不事

鞞扑而令自行正統己巳沙寇掠郡大軍南下措辦糧餉設畫備禦邑民賴以帖席

熊尚初

南昌人正統末以薦知泉州時鄧茂七分黨掠泉境請調衛兵未下賊勢危急尚初曰不可

延寇致迫吾城遂提民兵偕晉江薄史孟常除陽訓術正楊仕洪與賊戰於古陵坡兵力不繼被執不屈

與孟常仕洪皆遇害

徐瑛

杭州人正統末知晉江縣時汀寇為亂寧陽侯統軍駐延平檄調晉江民兵瑛恐民心騷動親詣軍

門陳其利害及大軍抵泉從容酬應民無驚擾

歐陽復

桂陽人景泰進士天順末知泉州廉明公恕有媼訟婦不孝復問曰婦不供饋乎媼言絕食者

四餐夫因責婦婦曰餓姑不孝維貧何敢復見媪無
飢色乃陰令人以桐油煎麩餅食媪媪食之所嘔皆
白絮復以大義責媪
遂大悔悟感泣而去

錢輅

字廷用全椒人有才畧景泰中海寇嚴啓盛恃險
為亂輅率舟師追七日夜至黑水洋大小十一戰
賊敗遁復征沙尤寇斬首蕭政通以功陞泉州永寧
衛指揮同知輅知書事母孝教子嚴治家有法閨門

肅然

武成

通州人初為泉州衛千戶有勇畧善騎射正統末
沙尤寇起成累立戰功擢本衛指揮僉事天順間
龍巖上杭寇竊發成復著戰功成化初召至京以母
老乞歸養尋擢福建都指揮僉事提督海道性孝友

禮賢敬士
有儒將風

張遜

字時敏無錫人成化間舉人知同安縣潔已愛民刑清政舉嘗為扁揭中堂題曰民不畏嚴而畏廉

民不服能而服公公則能明廉則不擾擢知福寧州父老齋金為贍峻却之邑為立却金亭於榕溪之上

羅倫

字彝正永豐人成化間廷對第一人授修撰以疏李賢奪情忤旨謫提舉泉州府司倫自幼矢志

聖賢之學至泉日有司率諸生從之講明正學心賞南安片瓦巖徘徊吟咏有仙家白晝應無夜玉樹長春未覺秋之句學者稱為一峰先生

高祐

字天錫上海人成化中任泉州同知以禮義訓民頑梗革面歲饑貸民粟山鄉寫遠者召良善鄉老

總校分給全活無算嘗道漳州宿山家有奸民負豪家債而憤其凌迫者聚千人將以期旦焚劫豪家亦號衆繕械為敵祐變服往諭片言解散後歷廣平東昌二府皆有善績上海人論其鄉先達有三婦之喻

獨目祐為

節婦云

陳用之

成化中永寧衛知事永寧海上地絃誦聲稀用之訪諸貴胄及戎籍子弟之秀者勸使就學時

詣門諭之曰古人雖在軍旅不廢詩書道藝人間惟此一種味最不可少且為敦請興化耆宿陳愈為諸生師既三年得可造者三十人白當道乞如民間俊秀例充附泉州府學以均教育以勸來者自是永寧文風日進學者德之立祠祀焉

黃濟

字翊時臨川人弘治中以進士知南安公清廉平人莫敢干訓誨生徒冤獄多所超雪南安為都四

十有八而濱海四十一都自宣德後逋亡過半田地荒復為鄰郡豪強乘間兼併濟多方招徠按數核實使逋民復業復無不田田無不賦賦無不均居三年召為太僕丞

洗文淵

字希哲順德人正德舉人知南安縣居官清苦不苟徇上官意時逆瑾使者旁午郡縣誅求無

已乃自械為民請命
他邑騷然南安獨免

張津

字廣漢博羅人成化進士初授建陽令正德間以監察御史出知泉州時逆瑾扇焰鎮舶私人絡繹

郡邑津以嚴重鎮之輒屏息去政平而信吏民畏服在郡三月瑾逐不附已者許進馬文升劉大夏與津

共四人

李緝

餘干人弘治舉人正德中以濮州牧任泉州同知仁慈果斷以伸釋枉滯與民省事為先民有投牘

大司者輒號乞曰必下牘於李二府非李二府不如還吾牘也嘗歎泉郡戎伍勾補之弊佐郡一年凡鄰郡戎衛之機至辨真偽量遠近審民夫衆寡蘇瘁之數權其常行與否民賴以全室家相慶陞魯府長史

鄧季綬

南昌人正德中任晉江主簿前簿何讓大肆虐民季綬一以慈易為治值歲饑承檄閱視報云

當免民全征尋以失實坐罪退不樂語其子曰二月實絲自忍心頭之痛宮中飛雪誰知邊外之寒遂棄

官

屠倬

郵縣人嘉靖間知泉州修飭方正吏胥憚之時各寺田為豪家所據而賦役坐累寺僧倬悉取田券

計畝派稅開給帖文逋者追田入官自此僧無負累

俞咨伯

平湖人嘉靖間知泉州會歲旱且值寇警販運不通郡大饑乏咨伯躬詣都里差等貧戶發粟

賑給又煮粥以濟詭昂米價招誘外商嚴禁包攬侵尅之弊不半月米舟雲集價頓平全活者數萬人

熊汝達

進賢人嘉靖間知泉州時倭寇由海岸突犯安平侵逼郡城汝達多方禦却城中有奸徒謀為

賊內應者以計擒之督府提客兵萬餘成郡糧餉犒給器械凡百峻促汝達從容支應多從節省有不便輒持檄入白必得請乃已歷官南京右都御史

朱炳如字仲南桂陽人嘉靖進士以御史出知泉州嘗慕王十朋真德秀芳躅先教化而後刑罰擇諸

生才俊者談道論文士皆勃然自奮居官三載不以家累自隨惟兩僕供爨而已

盧仲佃字汝田金華人嘉靖進士知晉江縣安平舊無城經營砌造以備守禦倭寇猖獗軍興乏餉上

官建議弓兵加征洛陽置官權稅仲佃再三申請除豁民甚德之

夏汝礪融縣人嘉靖間知南安縣縣舊無城倭寇時剽掠汝礪毅然以興築為己任計田出直計丁出

夫不二載而工完未幾土寇褚鐸作亂率眾攻城堅不可入

唐愛

字良德嘉定人嘉靖間進士授南安縣縣舊為同安借編弓兵三百三十四名愛覈同安丁米皆詭

寄鹽戶避重就輕貽累鄰邑申請編減三分之一歲派輸嘉禾倉米又為申請折價邑人德之擢兵部主事

林咸

番禺人嘉靖間知惠安縣會倭寇破福清南下悉力攻惠安咸晝夜登陴率民死守城賴以完越數

日倭由海道寇鴨山咸統民兵討之戰歿贈府同知賜祭官其一子

馬一洪

仙居人嘉靖間南安縣丞時海寇阮其寶等十種為患郡守知一洪賢俾討賊遂督舟師破

賊於小磴南岸俘獲甚衆賊退草與值風浪洶湧悉眾攻之阮賊授首餘黨盡殲未幾晉江石湖蚶江諸寇繼至一洪乘夜追擊皆望風奔竄上官旌之

俞大猷

泉州百戶舉武闈第五授汀漳守備歷廣東都司僉書改浙東參將進南省隸副總都督僉事

緣事削職尋復用為南贛副總適倭攻興化大猷與戚繼光勦克之復陞都督同知佩征蠻將軍印晉都

督僉書加世襲改福建總兵未幾乞歸著有正氣堂集劍經行世

黃懌

字德和蕭山人嘉靖間舉人知安溪縣縣民素弱每制於外邑勢宦懌至正之以法由是豪強相戒

斂跡朔望嘗集諸生論文又建社學設養濟院藥局義冢百廢具舉

顏容端

字體敬廣東長樂人嘉靖間知南安縣會汀漳流寇抄掠容端集諸道民兵設伏於雞母與擒

道 穢無

葉春及

字化甫歸善人嘉靖初赴公車上書萬餘言當路目為迂隆慶間知惠安縣單騎入境採風謠

訪民疾苦凡邑所困重役悉為申改官催徵納規則
織悉曲盡八郡傳以為式隱士康朔孝子王定民皆

躬至其

廬禮焉

羅文靖

南昌人隆慶間泉州司理郡有大姓為不逞者
以人命誣訟文靖廉其枉立剖之及遷秩大姓

感其德懷金為賂却之復隨至境外乃曉之曰理枉
吾職也本不任受德矧受餽耶爾愛我何薄待我也

餽者

歎服

習孔教

廬陵人隆慶進士官檢討沈毅方正為時相所
擠謫泉州推官時郡人王用汲亦以建言忤時

相削籍家居相與講道論學尤精人倫
藻鑑後時相敗召還歷官禮部侍郎

竇子偁

合肥人萬厯間進士知泉州
性高潔竿牘苞苴不至其門

張應泰

字大來涇縣人萬曆進士以南駕部任泉州守初至懲頑梗為民害者吏民斂戢盜不入境會

以大計謫官泉民持長旂書太守善政奔省控留不可乃壘石城門城外之梁盡斷絕之兩臺使者為請銓曹得降秩仍知泉州應泰政事之外兼有文章古文詞賦贈灸時流

楊一桂

清江人萬曆間泉州府丞莅任九年宅心平恕未嘗枉罪一人沿海將士歲時餽遺皆無所取

擢潯州

知府

陽思謙

新化人萬曆間由進士知泉州府撫綏振飭易俗移風民德之

蔡善繼

烏程人萬曆間由進士知泉州府有異政負人倫藻鑑

彭國光

德化人萬曆間進士知晉江縣時分巡僉事恣睢酷虐國光與郡守鄒墀以凝靜持之士民賴

以帖

席

夏建寅

秀水人萬厯間舉人知安溪縣廉明果斷不受私書有強之則曰偽耳終不發封嘗以公事行

村落自攜蔬食不費民間一飯後請去
率子孫徒步歸邑人攀望齋告出涕

國朝

徐騰鯨

遼東人順治三年以廩生署安溪縣時土寇林良蘇喬臨倪池杜宗文等出沒山海聚黨刦殺

騰鯨練鄉勇設奇計屢戰屢捷斬獲甚衆賊望風驚遁四境悉寧嘗捐俸鼎建文廟六年擢淮安管河

同知百姓
立碑頌焉

馬得功

遼東人順治十年以都督三等侯任福建水陸提督軍務丙中海寇圍會城得功督師應援會

省圖既解遂倍道追擊陸攻則從石鼓以扼其鋒水戰則遮峽江以奪其險克復閩安重鎮乘勝逐北復連羅福寧官塘威震海外移駐泉州結營鷺島造巨舟百餘艘復沿海十六城白沙南惠德化安溪等處老穴渠魁以次俘建邵汀漳溪濱嶺

窟諸寇翦除殆盡以積勞卒於官

韓曉

長安人順治十二年以廩生委知安溪縣時海氛未息人民凋瘵城郭傾壞曉多方安輯遂會議修

築城垣丙申正月興工鳩力調度有方不傷公貯不竭民脂邑人鑄一聯於城樓上有朱子原標龍鳳景

韓侯再造清寧疆之句以紀其功

吳英

字為高其先泉州人後入籍莆田康熙二年以平金厦功授都司甲寅耿變英為浙提左軍遊擊會

寧海將軍視師問諸將誰可膺大任者提督首以英對遂授為先鋒前後克復黃巖太平樂清青田象山

等縣解處州圍破逆黨曾養性於温州殲海寇張拱垣朱飛熊於毛頭洋復收捕逆昌松陽等山寇水陸數十戰皆親冒矢石先士卒定謀制勝每獻捷功居首擢副戎任閩制府中軍時海氛未靖屢犯下游英數出奇兵敗賊於陳三埧觀音山江東橋所向披靡擢同安總戎隨率舟師復平金厦是歲列郡大饑馳請總督姚啓聖出示許沿海百姓出界採捕全活百萬尋移鎮興化適提督施琅疏平澎臺遂統陸師為副誓衆登舟先取八罩選精銳焚賊巨艦奮勇直前立克澎湖凱旋入覲 溫旨褒嘉 賜鞍馬衣袍調浙舟山甫閏月擢四川提督凡十一年又以閩海巖疆授陸師提督未幾復調水師殫心經畫凡閩國計民生者無不悉力舉行後以年老乞休 賜 御書匾聯加威畧將軍尋又 賜詩存問年七十六卒於

官贈太

子少保

段應舉

遼東鎮藍旗人康熙十五年以都督同知提督福建軍務當克復泉州之日誓師戒殺秋毫無

擾寇圍海澄應舉矢志堅守食盡援絕至蒸靴底皮煮糊窓紙以為食兵民無一叛者不數日城陷遂自殺

王育賢

遼東正黃旗人康熙十七年分守興泉道駐泉州六月海寇圍泉州育賢日夜為戰守具與士卒

登陴守禦不解甲者四十餘日徒跣築垣躬操釜鏹開拔師至單騎自臨閭巷徧慰父老父老皆感激涕泣以勞卒圍解老幼輸貲運糶攜牲體以祭者數千人哭送三十餘里設木主崇陽樓下祀之

劉國興

字振宇直隸宣化人入伍隨征討平逆亂恢復遷界多立戰功由古田把總累遷提標右營遊

擊康熙十七年海寇圍泉州勢危累卵國興身先士卒竭力捍禦城賴以全每行軍所至紀律嚴明保全婦

女名節不可勝紀福泉二郡士民至今頌德歷任河北碣石詔州三鎮總兵官卒恩賜祭葬于世明任

福建巡撫陞本省總督閩人咸

慶國典能以陰隲作貽謀者

黃允芳

甌寧人康熙十七年由舉人任同安縣學教諭時海氛未靖以學舍屯駐兵馬允芳即以已計

借資斧蓋造營房申請移屯

文廟兩廡明倫堂廓

然一清著有河洛解孟子或問

文廟祀典禮器考

擢武清

縣尹

楊芳聲

宣府萬全左衛人康熙二十二年由歲貢任同安縣時當臺灣歸順徭役繁興芳聲措置有方

民無派累嘗歲早跣足禱

雨甘霖立應改任鳳山

朱奇珍

字平齋長沙人康熙五十一年由舉人知同安縣革弊除奸催科不擾賦亦無缺繕治囹圄男

女異所宿繫申密一空捐貲葺朱子祠
建高士軒修同安邑志年餘告養去

張起雲

字紫綬大寧人雍正六年由提標右營遊擊署
烽火門叅將信賞必罰訓練有方累遷南澳鎮

總兵官鎮為閩粵要衝商艘絡繹稽查為難起雲親
歷巡察安塘設哨規畫周詳沿海萑苻潛消遠跡凡
營卒年老無依者悉捐俸米以資其生又捐施醫藥
以愈兵民瘴癘芟除毒草以免愚氓輕生治軍餘暇
手不釋卷游覽所至形為文章九年署陸路提督端
已率屬恤兵愛民以勞卒於官兵民思之十年特

音祀賢

良祠

漳州府

唐

陳政

字一民光州固始人太宗朝從父克耕攻克臨汾等郡高宗總章二年泉湖間蠻獠嘯亂進政朝議

大夫統嶺南行軍總管事出鎮綏安比至草創經營備極勞瘁自以衆寡不敵退保九龍山奏請援兵朝命以政兄敏洎數領軍校五十八姓來援乃進屯梁山外之雲霄鎮火田村居焉嘗渡雲霄江謂父老曰此水如上黨之清漳故以漳名

陳元光

光州固始人以鷹揚衛將軍隨父政戍閩父死代之永隆初擊降潮州盜奏請創置漳州謂周

官七閩宜增為八詔從之即命元光鎮撫迺翦荆棘開村落招集流亡務農積粟千里內外無抱鼓之聲後討嶺南流寇戰死事聞贈右豹韜衛大將軍立廟漳浦縣開元四年追封穎川侯謚昭烈

李伯瑤

字崑宗衛國公李靖孫總章二年從陳政鎮泉湖為前部先鋒討山寨諸賊伯瑤知賊狡獪乃

沿江樹柳為營伴為不進以驕兵之計致賊遂擒藍雷二賊首殺之平三十六寨政子元光既請建州治秦伯瑤與馬仁等有幹畧請校為司馬等官又嘗與兵鑿斷鵝頭山平娘子洞諸寨戰功推第一子十三人皆貴宋紹興間屢顯靈異贈威武輔勝上將軍漳人廟祀之

盧如金

光州固始人領本州司戶參軍始建屯營於雲霄修竹里與陳元光許天正謀拓山林置州漳

水之北後嶺南流寇掠境元光戰歿如金率兵討之羣盜悉潰漳以保全卒葬於連坑山

丁儒

固始人通經術喜吟咏練達世務陳政引為軍諮祭酒元光代政引儒佐郡與元光驅盜賊翦荆棘

營置漳郡勸農重本國用以周負固不服者率輕銳撫之漳人頌元光父子輒稱佐郡丁承亭云

柳少安

建中三年以秋官員外郎領漳州事精天文地理按部至龍溪謂本州別駕陳謨曰此地可建

州治疏請於朝未允貞元二年觀察使盧恭
從錄前疏上之制曰可遂移州治於龍溪

韓泰

字安平貞元中任漳州刺史悉心為治官吏奉法
百姓安堵韓愈刺潮州與漳接壤見泰政事自謂

不如及刺袁
州舉以自代

宋

方慎從

莆田人景祐初知漳州越十五年又以屯田郎
中再知州事漳人夾道歡呼曰吾父復來矣詳

興化
人物

呂璫

晉江人景祐間知漳浦適汀虔寇發璫募民為兵
教以攻守之法賊不敢犯時多虎患設窋以待祝

曰暴吾民者入吾窋三日虎
自投窋者三既去民祀之

柯述

南安人熙寧中判漳州以救饑得民心有雙鵲棲其廳事迨去鵲亦送之

傅希龍

仙遊人元祐間以進士知漳浦作興文教鑿河引潮水入泮池人呼傅公河性鯁直不附二蔡

終本

縣令

黃穎

字仲實莆田人嘗就學於陳襄元祐間舉經明行修科弗就時襄為中丞疏其學行以聞哲宗降袍

笏就其家起之授知長泰日與諸生講論古人義理又以職田未徵穀三百石與耕民尋權龍溪尉卒兩縣士民賫金帛為賻子公坦不受

陳可大

仙遊人政和間進士調漳州工曹龍和二邑上死罪強盜七人可大力辯其寃得不死時稱神

明

林迪

興化人政和間知龍溪平易近人民乞留之蔡京林出也嘗欲交迪謝不往

王濟

字巨川政和初補龍溪簿有司督輸鶴翎為箭羽殊急民苦之濟諭民以鵝翎代仍駢奏其事詔從之有里豪包陂塘課數百頃而專其利濟悉取之引水以灌民田汀州以銀冶構訟十年不決累數百人轉運使命濟一訊盡得其情坐者數人而已

黃琮

莆田人宣和六年判漳州與郡守鄉人方翼寅恭相濟卒成美政會有寇警命琮統督劍建王兵以備攻守更定鹽法商民便之

蔡崇禮

字叔厚高密人建炎四年知漳州屬巨寇起建州聲撼隣境人心動搖崇禮一鎮以靜內外安

堵仕終寶文閣直學士
知紹興府進爵高密侯

崔亮

熙州人從高宗渡江領兵戍漳州以討賊戰歿
贈武顯大夫建祠於龍巖縣西湖賜額表忠

廖剛

順昌人紹興間知漳州漳俗侈靡婚葬踰制剛首
立條約以諭之會日食上疏正建國儲君之號帝

讀之聳然召拜御史

中丞詳延平人物

胡銓

廬陵人紹興間知漳州初湯思退與張浚和戰異
議浚罷政銓上章數秦檜孫近等罪由是遣銓安

置海道尋

改泉州

李彌遜

連江人歷官禮部侍郎紹興中嘗斥和戎之非
與秦檜相抗出知漳州興漳學復慶厯舊規郡

人德之朱熹守漳以文謁其祠曰惟此廟學實公
所遷人到於今追頌勞烈矧惟忠慮抑有前聞

劉才邵

字美中廬陵人宣和間中宏詞科紹興中知漳
州於城東開十四渠為閘與陡門以瀦滙決漑

田數千畝

民德之

陳知柔

永春人紹興進士教授漳州會朱熹為同安簿有公事至漳知柔館之立先賢祠而自為記詳

永春州人物

林孝澤

莆田人隆興二年知漳州始至值邊戍還家索添支錢謀堂下孝澤曰若輩胥太守欲反耶太

守可殺添支錢不可強取令回營置為首者於法遂帖服

何侑

字德器龍泉人乾道中以大理丞出知漳州嘗謂官無閒劇以公正廉勤為主作天爵銘吏治戒並

歎習一篇皆中薄俗之病

趙公綱

宋宗室淳熙中以承議郎知漳州州鹽故由官鬻民苦於戶均口率之令公綱罷之民始得挈

樞就官市役檄罷戍卒及郡兵每歲供應民大稱便

韓俊

開封人沈毅有謀淳熙中漳州土盜竊發孝宗親擢本路統制臨遣諭以久任在軍二十四年拊御

訓練有古良將風

黃啓宗

淳熙間知漳州詔勞之曰啓宗清廉律已撫字有勞除秘閣修撰

翁德廣

建寧人淳熙中知龍溪每歲解徒流以上罪率數十德廣委曲問難必盡獄情及司理院再鞫

卒無異詞訴牒極煩隨事處斷終朝而畢朱熹疏薦之以為考其治行庶幾古之循吏云

陳舜申

連江人淳熙進士知漳浦問民疾苦多所建置部使者上其治狀入為著作郎

朱熹

紹熙中守漳奏除屬邑無名之賦七百萬減經制錢四百萬以漳屬未知禮教述古今禮律採古喪

葬嫁娶之儀以示之命父老解說以教子弟時即學舍誨誘諸生又擇士有行義者列學職為諸生倡漳俗崇信釋氏男女聚僧廬為傳經會女不嫁者私創庵舍以居悉禁之嘗病古經界法不行大為民害乃訪事宜擇委任悉究方量諸法條奏以上有旨先行於漳州會南方春旱不及行又嘗病本州鹽深為民害先罷其瀕海之舖十之一欲俟經界既定然後闔郡悉除之而志不克遂熹在漳首尾僅一期一以道德正大為治人心肅然官曹皆勵志節宦族咸遵法度胥徒不敢行奸豪右不敢舞禁奸民鼠竊未有峻懲皆望風屏跡方歲正月布孝弟之訓與民更始罷上元放燈以除惡禮立風雨雷師壇以正常祀省燕約饋寬賦簡役勸農厲兵善

政在民未易悉載詳建寧人物

趙師處

宋宗室為漳州錄事參軍朱熹守漳日聞其為人首薦之州人心服

趙伯遇

宋宗室家晉江登乾道進士慶元中知漳州蠲鬻鹽宿負以其羨餘造浮梁民德之

傅伯成

晉江人隆興進士慶元間知漳州叛惠民藥局濟民病造橋三十五所治道十萬丈戒富民閉

糶有林仁訴其兄多藏可令出穀判曰官司寧可無穀兄弟告訐之風不可長也遷工部侍郎詳泉州人物

敖陶孫

福清人慶元五年進士任漳州教授時學租為人侵佔陶孫清之又闢學門之淺陋者請郡守

趙汝諧修嘉定志詳福州人物

陳樸

知柔從子慶元間知漳州節浮費五萬代民納丁錢七十餘貫官至廣東安撫使

俞亨宗

大田人嘉泰初知漳州罷鬻鹽免場等錢又以新增廂禁卒廩給代民納門丁輸禁四邑科罰

追治其已甚者吏皆畏戢嘗言州縣苛取於民徒資不切浮費而已因以所罷鹽鋪及除出糶佃之由詳

述本末碑記
以告來者

趙汝謙

嘉定初知漳州闢學門廣齋舍造南石橋建城東門奏蠲經總制錢五分之二

莊夏

永春人淳熙進士嘉定中知漳州建通濟橋奏罷高荒俵寄莊錢民納苗米聽自槩量郡人德之

危稹

臨川人嘉定間知漳州漳俗多不葬親稹立義冢三約期責之葬建龍江書院橫經自講人皆歆動屬令賂章者劾去之郡有經總無名錢歲五千緡厲民實甚前守趙汝謙奏蠲五分之二稹悉為疏罷民

甚便

馬

蔡次傳

寶慶初任漳司戶叅軍為守危稹所器延之僉幕嘗餉以私錢不受以建公廳

趙師縉

紹定中知漳浦先是學宮災師縉擇地重建是年應薦者八人邑郭西有古陂受西來諸山水

歲久淤塞師縉闢而治之沿陂為堤立陡門以資蓄洩廣五百餘丈溉民田不可數計

趙以夫

長樂人端平中知漳州始至郡隣寇猝乘諸道兵咸集以夫調度賞勞事辦而民不加斂漳民

苦丁錢奏以廢寺租代輸真德秀上其事謂此舉可為分符守土者法詔從之復罷鬻鹽行募役法禁報

恩塔會詳

福州人物

李韶

彌遜曾孫嘉熙間以乞還魏了翁及疏劾內侍女冠不聽出知漳州捐已俸置學田創虎渡石橋民

號為李生佛後遷禮部侍郎先是彌遜亦以戶部侍郎知漳漳人誦之曰方千里內一太守二百年間兩

郎侍

章大任

金華人淳祐八年以朝散郎知漳州興利除害疏學宮貢院水溝壅塞又浚官渠修四門城重

建南樓以正籌漏時山寇為亂大任力除之

王序

晉江人咸淳中知長泰時郡僉幕預徵大禮銀及打量田土文檄甚峻序白郡力爭之民戴之如父

母宋亡終身不仕

陳敏

石城人精騎射有韜畧御士得其歡心擾攘中率家丁入閩討賊兵帥薛弼推為漳州巡簡時草寇

跳踉山谷敏往來龍巖漳浦永春德化間勦蕩悉平民德之所至為立祠以功遠本路統制歷江淮都統

制卒贈少師

元

雅爾噶爾 至元中為漳州路達嚕噶齊築城以備不虞漳人賴以保障

烏克遜良禎 至元中漳州路推官獄有疑者悉平反之嘗上言律徒者不杖今杖而又徒非恤刑

意宜加徒減杖詔從之著為令

闕文興 漳州萬戶府知事至元間陳吊眼寇漳文興戰死妻王氏被掠義不受辱亦死事聞予褒贈

陳君用 漳浦人至元中討平劇賊李志甫黃二使授本路總管同知復擒北洋海賊楊奴陳毛降其餘

黨又破汀賊羅天麟鄧師公於白花嶺降潮寇夏山虎投宣武將軍南勝伯詳人物

羅良 長汀人至正間傾資募兵平南勝賊李志甫未幾番寇吳仲海繼發詹天驥掠邊悉討平之又寇逼

福州良日夜沿海道而至以藥弩射賊皆立死寇大驚遁去又以樓船載糧沿海道抵遼東以給行在軍

帝嘉其忠封漳州路總管後
死陳有定之難詳汀州人物

默色都哩

至正間為漳浦達嚕噶齊廉勤愛民時縣無
堅城賊至輒棄遁不敢守都刺以石砌之邑

賴以全後卒於
官民祠祀焉

唐大年

正正八年以行省知事攝龍溪尹寬以
惠民毅以任重民不敢違吏不敢欺

蔡淳

長泰人至正中賊萬貴與嘉禾千戶何迪立叛寇
漳泉高指揮薦淳武勇與兵三千遣與賊戰賊益

兵圍之三匝援兵至淳夾擊大破之上其功陞攝長
泰尹事寇李角車叛淳單騎諭之賊歸款尋陞正尹

鄧朝陽

至正十一年知龍溪興利除害擇學行之士
為鄉師以教民而革其獷悍之俗民畏懷之

呼都克和卓

至正間授長泰尹廉介精明不避權幸
鋤強梗植善良工役以時百廢具舉

扈海

字巨源衛輝人至正中任南靖尹時番寇煽亂夜入公廨海罵曰尹承王命父母汝也汝欲殺父母

耶賊駭散在任興學校均
徭役撫字勤勞政清訟簡

韓景晦

至正中任南靖尹邑承番寇亂後又苦瘴癘景
晦請徙縣治於雙溪改南勝為南靖完城堡興

學校民至

今思之

德呼穆蘓

西域人至正末為漳州路達嚕噶齊三年民
安之明兵取福建興泉皆納款彌實仰天歎

曰吾荷國恩有死而已及聞招諭使至乃從容具公
服北面再拜遂引斧斫其印文又大書手版曰大元

臣子端坐取
佩刀自刺死

明

潘琳

字師道平揚人洪武初知漳州時府治弗葺琳恐改建勞民乃召諸寺僧襄事五閱月而成人稱其

處置得

宜云

張理

字玉文鄱陽人洪武初知漳浦時詔徵屯田軍入京萬戶吳世策乘機以衆叛理集民兵攻世策戮

之具奏免屯軍徵又磔海寇林仲明等徙土豪建文廟及羣祀壇身沒索無一文

徐恭

永豐人洪武中知漳州時官軍收捕龍巖叛賊繫其男女三百餘人請置於獄恭曰此非先王罪人

不孥意也上其事詔釋之赤嶺寺旁有祠常有毒氣中人輒死恭率吏卒集祠下擊神像踣地責以殃民

罪狀投之江翼日雷震巨蟒死害遂絕

王仲謙

洪武中知漳州廉慎公恕政清訟簡崇獎士類激勵風俗士民懷之

次已可車全書

福建通志

聖

錢古訓

餘姚人洪武中以進士知漳州以文章飾吏事表著忠孝激勵風俗甚有聲稱

王禕

字子充義烏人以元儒見太祖議即位禮忤旨出判漳州嘗作漳南十詠紀載風土居漳一年召修

史元

鄧清

陵州人洪武間知長泰時賦斂清訟獄均徭役革奸弊歲旱禱雨輒應莅政三載凋瘵以蘇流移以

復

張從道

解州人洪武間以進士任長泰崇學校勸農桑朔望入學講課雖盛夏不去公服

劉孟雍

南昌人洪武二十六年知龍溪釐革宿弊吏畏民服秩滿擢祁州邑人乞留復再任

陳思賢

茂名人洪武末任漳州教授靖難詔至召生徒吳性原陳應宗林珏鄒君默曾定瑞呂賢六人

於明倫堂相與慟哭曰明倫之義正在今日即
堂為舊君位哭臨如禮被繫入京與六生皆死

劉奎

博羅人宣德初知長泰疏治陂塘溝洫招回逃亡
民戶均平賄累浮糧奏立巡檢於朝天嶺以禦盜

在任九年虎不害人嘉禾一莖三穗秩滿民
相率借留陞秩仍掌縣事凡二十一年乃歸

甘瑛

豐城人正統初知漳州時軍衛橫甚年例闕於有
司暴取無厭瑛奏革之海門山居民多涉海為盜

瑛遷之內地又興學校闢府
治修柳營江橋皆有足稱

陳士名

無錫人正統末鄧寇為亂邑里殘破巡撫薛希
璉奏乞練達老成宜為令者分布各縣乃以士

名知南靖命乘傳來任多方招
輯賑濟縣乃復初秩滿致仕

張璫

合肥人福建行都司都指揮僉事正
統二年破龍巖等賊還卒於晉安驛

欽定四庫全書

卷三十

顧斌

其先懷遠人世襲漳州衛指揮僉事正統戊辰鄧茂七黨揚福率眾數萬圍漳設雲梯仰攻勢危甚

時斌督兵備倭海上夜率舟師五百人航海來援突圍入城盡散其家資募死士雜服鮮明綵繒插雉羽為神兵開東門迎戰斌躍馬大呼以百騎直壓賊壘麾死士為兩翼夾以巨斧砍之賊大敗去翼日復益兵來攻又破之餘黨夜遁城賴以全事聞擢都指揮僉事及卒貧無以葬知府姜諒率郡人鳩金襄其事且代石以志全城之功

謝騫

當塗人正統進士景泰四年由御史出知漳州政尚嚴明人畏而愛之近海月港諸處民多貨番為

盜騫隨地編甲隨甲置總以聯屬其入戶為限期稽察之其近海遠式船隻皆令拆卸以五六尺為度烙以官印朝出暮歸令甲惣查察盜息民安

林瑛 歷城人景泰中知漳浦時兵燹之餘豪梗自恣民不聊生瑛至問疾苦有犯輒按其罪不少貸三年

卒於官

劉璧 廬陵人舉進士成化間以御史出知漳浦剖決明敏境內無冤旁邑有疑獄請質咸得其理興學校

立社倉較量隱田履畝定則嚙水者
勘豁其租民深德之陞桂林知府

張瓚 字德潤番禺人天順進士成化十年知漳州值山水大發人民漂溺瓚具船救援先發倉賑濟而後

申報當道惡其專瓚曰待報而後發民死盡矣因奏減六縣田租有差又留意學校漳人士多業周易為

延莆名宿益授
尚書多所成就

姜諒 字用貞嘉興人舉進士成化間知漳州值歲歉海盜竄起諒發廉賑乏簡練丁壯授以方畧擒渠賊

斬之餘黨悉散乃築堤捍潮置倉備荒禁佛齋作義家立鄉約建祠祀先儒高登陳淳為文以表迭里彌實之忠義顧斌之保障出榜數十條勸諭防範善政畢舉御史張稷上其考有盜化民安之語後以入覲乞養歸者老數輩請再任不報謝

鐸稱其廉介之節始終一致云

陳良

會昌人成化初授長泰縣躬巡阡陌勸課農桑惰者諭以衣食利害之原無農具穀種者籍姓名補

助之常夜巡緝訪賭盜民愛而畏之

張本

餘干人舉人成化間知南靖始至縣堂吏舍幕庫悉捐俸以次修葺上杭溪南寇至本團集民快招募番客扼險隘賊不敢犯以丁外艱去

汪鳳

字天瑞弋陽人舉進士弘治初知漳州時境內盜起鳳捧檄莅任不過家門至之日揭榜諭賊禍福

乃引兵感之賊皆就擒嘗修文廟葺雙節祠
作捍海石堤鑿井道旁防坑水之毒政績甚著

胥文相

巴陵人弘治進士知漳浦邑苦蝗文相引憲修
省蝗悉赴海死歲以大熟金溪山有銀殲歲久

脈微取不充用額賦
轉重文相奏罷之

朱絃

無錫人弘治進士以御史出知長泰有惠政
嘗創築縣城保障有賴民咸曰古之遺愛

陳思謨

河源人嘗從湛若水學授龍溪簿布衣蔬食以
自給尋以治行陞本縣尹所居廨產靈芝一本

九莖為嘉
祥之應

彭桓

吉水人弘治庚戌進士由禮部郎出守漳州明敏
嚴毅人不敢犯有勢豪為民患立置之法輿論稱

快修墜舉廢敬教勸
學以艱去民懷之

陳洪謨

字宗禹武陵人舉進士正德初知漳州拒海寇
平山賊立朱熹祠建社學興水利掩野豁延周

瑛以績淳祐未修
之志民祠祀之

鍾湘

字用秀興國人舉進士正德間知漳州時南靖賊
詹師富等聚衆劫掠騷動三省朝命臺官之長督

重兵進剿湘率死士搃賊巢縛首惡諸脅從者給牛
粟遣之賊皆感激激帖然聽命海寇聞之亦皆就降兵
遂罷因奏設平和縣歲饑賑濟有方法活人數萬又立
社學買田延師以訓導民擢廣東叅政未行卒漳人
像祀
焉

徐恂

嘉定人正德間知南靖會山寇起民大驚擾恂親
按兵齋糧以遏賊鋒賊聞有備不敢入境營建學

校門牆齋廡煥然一新
卒於官邑民痛之

紀鏞

永豐人正德初任漳浦丞粵寇害民鎮巡會勦賊退保大帽山據險自固鏞率民兵深入攻圍賊突

出兵皆潰鏞馬驚墜坑谷中被殺事聞于廕卹

周期雍

字汝和寧州人正德進士以僉事飭兵汀漳時漳寇負隅期雍用間離其黨復整衆厚陣以臨

之察其可撫者單騎扣壘諭以禍福賊皆感泣就撫數年梗孽悉平因奏立巡檢盤詰谿洞晏然

曾鵬

瓊州人正德十一年以進士知龍溪時賊方平鵬一鎮以靜民賴安堵

覃桓

河陽人襲漳州衛指揮僉事諳韜鈴習弓馬正德中征捕南靖金山大溪諸賊計擒賊首楊宗壽欽

賞帛鈔後把總銅山水寨設策招撫海寇馬宗寶等十一年流賊詹師富屯結盧溪河頭之大拿山委桓會勦擒獲賊首張顯福藍三等四十餘人又擒張高村賊首羅定亮餘衆奔象湖山拒守南靖縣請添兵

調桓出哨會同粵兵夾攻未至猝與賊遇與戰射其
梁魁賊佯走桓乘勝追逐賊叢戟刺之中咽喉死

侯鑑

字子明沂州人三歲而孤母杜氏撫之成立正德
中襲漳州衛指揮同知性至孝嘗以小過撻士卒

母怒鞭之流血無怨詞命之跪終日不敢起母病侍
寢湯藥不解帶稽顙北辰號泣終夜母尋愈後以壽

終既葬有羣鳥繞墓悲鳴三日知府陳洪謨為孝感記

邵梗

字良用仁和人嘉靖進士任福建巡海道駐漳州
時海禁廢弛嘉民出入賈禍梗廉其有狀者殺之

羅織相告者勿詰反側悉安倭寇犯長泰選火藥手
百人躡擊之賊宵遁又遣舟師攻海寇於月港銅山

清漳諸處凡七克寇悉平又以月港宜建城而分龍
溪之半以為縣可弭寇是為海澄縣既去民祀之

唐九德

字伯懋湘潭人嘉靖中為漳守會群盜肆起始
至廉諸欲附賊者悉擒之中丞汪道昆決意主

勦命戚繼光持兵海上九德為先度要害設守備調遣如策旬日賊衆縛其梟黨以獻賊首吳平潛赴海死山賊蘇阿普據巢旁掠因乘勝進勦悉平之復議建水寨以絕盜藪修葺書院以課諸生興利除弊民

咸稱便

羅青霄

忠州人嘉靖進士隆慶中知漳州嘗創天寶學田以贍寒士築八卦樓以發地勝增建敵樓作

四門月城以固守圍又以月港寇亂通販禁嚴為請當事弛之軍餉故有定額後加派丁四米八民間重困因議徵減半著為例又議除客兵練土著等十八事覈見施行以掛議致仕去

龍遂

永新人嘉靖間進士選刑科給事中直諫忤嚴嵩謫漳郡丞以廉介聞

李畿嗣

蘄水人嘉靖間以進士遷漳郡丞署郡半載棠牘盈几一目數行片言立折與諸屬約徵輸訟

欲但文牒催督而已終不遣
一吏卒至縣陞廣東副使

王祿

新城人嘉靖間以舉人知平和時邑尚草創祿開社學置學田設壇廟義冢修鋪舍養濟院五年庶

事畢舉嘗獻議大禮及請
立皇儲與時不合棄官歸

周仲

吉水人嘉靖間知漳浦嘗濬傅公河
修葺社學郵置橋梁道路邑人頌之

慎蒙

字子正歸安人嘉靖中為漳浦令明察善斷不避
豪貴邑有盜憑負山海出入剽掠蒙令邑豪十餘
輩偽與盜通助其攻掠密率部曲捕之邑豪內應遂
縛巨酋三十六人賊解散令行遠近道不拾遺徵拜

南御
史

劉欽命

廬陵人嘉靖中知漳浦倭寇侵境城卑圯不足
恃為築高五六尺適淫潦堞壞山寇猝至復浚

溝列柵禦之寇引
去士民立碑紀績

周賢宣

萬安人嘉靖間為巡海道副使計擒月港寇張維等反側始安而龍巖東西洋盜憑險阻嘯聚

剽掠賢宣復討平之力請建縣當事報可遂單車入境相地闢基設寧洋縣治樹碣殺孤嶺又以興學為本務禮潘鳴時施仁為五經書院長寧洋父老至今思之

蕭廷宣

虛陵人嘉靖間以舉人令長泰時倭寇梟張城垣卑薄乃增僱役授工堅築之踰年寇至率諸

生王得麟等督兵登陴殺傷賊以數百計賊報勾引者數人責之曰此中真勁敵名為弱誑我來耶賊退備帥擁兵至百姓怨其不援縱兵士擄掠閉城拒之廷宣復與諸生登城責數帥帥大怒言於上官廷宣幾不免而王得麟遂死杖下餘皆落士籍

丁玘

丹陽人嘉靖中知南靖政暇詣學與諸生講論選
民間俊秀子弟教以小學延名士為師歲饑發粟

賑民捐俸為粥全活

甚衆末年投牒歸

謝明德

字明之高要人嘉靖辛卯舉人知平和除苛令
議賑貸禁服毒捕宿惡詔安白葉峒自正德時

憑險負固明德上狀請討之檄幕下而朝誓師分道
深入賊皆驚潰擒陳劉二酋及餘黨數百人覆其穴

漳汀潮贛四郡歡呼相慶

督撫交薦之遷判潮州

郭大鯤

海陽人嘉靖進士知南靖縣興學造士鋤
暴抑強禁服毒刑賭盜以勞卒邑人傷之

殷伯固

博羅人嘉靖間知南靖興學校增置學舍勸富
戶出義穀以賑饑嚴禁圖賴以厚風俗時饒賊

張璉倡亂永豐民煽起聚衆八百餘人直
逼縣城伯固單騎出城諭以禍福悉遁去

童乾震

嘉靖中任銅山水寨把總與其子養銳千戶白仁義士陳學書等領兵禦倭屢有斬獲時人為

語曰軍中二童倭賊一空抵東嶽山與賊交戰殺傷甚衆援兵不至與學書等力戰死朝命立祠祀之官

其子養銳

為指揮使

姜遂初

臨川人嘉靖間與舉人知平和時饒寇掠近縣城晝則督兵追捕夜則嚴加防守賊退多方撫

字以勞卒

民惜之

張鳳來

秀水人嘉靖間以巡海道駐漳南時瘡痍甫平加意休息緩刑止訟抑吏卒不妄差遣節里甲

供應公署所需一從儉約臨

去惟懷器用悉署簿籍給領

何春

雩都人嘉靖中以舉人知詔安為政不拘簿領暇日詣明倫堂與諸生講論示以趨向教民行鄉約

習朱熹家禮又毀淫祠禁圖賴
為循良第一未幾改含山縣

翼有成

嘉定人嘉靖間以舉人知詔安時倭寇發土寇乘之大肆劫掠有成繕城浚濠經營防禦與倭

寇數戰俱有功又勦滅溪東小篆二賊中丞阮鶚率師至詔安以梅嶺人皆賊嚮導欲盡殲之有成堅執

不肯署卒罷其議全活萬計為

漳南保障第一陞贛州同知

梁士楚

番禺人嘉靖間以舉人知詔安會倭亂山海寇並起士楚調度兵馬糧餉船隻相機勦撫擒斬

倭寇撫散山賊鍾旺雷晚香等又計斬海賊吳平散其餘黨縣治窄狹乃請增築縣城親自程督俄以憂

去後陞福建練兵僉事駐

詔安漳民恃為保障云

林挺春

字少和順德人嘉靖中以舉人知南靖兵燹之後官舍蕩析挺春芟穢掩骼倚茅聽政已而遷

治於大帽山下招流移撫凋
瘵邑以大治陞露蓋知州

王謹

漳州衛指揮使嘉靖末奉檄守閩安鎮調兵攻勦
瀟海灣門倭寇船隻羣隊飛出謹奮勇接戰衝沈

大倭船數隻追至梅嶼海洋射殺倭將一員
又乘勝追之於小蟹礁援兵不至力戰而死

沈銳

錢塘人萬厯間任漳清軍同知嘗却湖賈常例值
吳雙引謀亂得姦黨密書輒自焚棄反側以安

姚應龍

慈谿人隆慶間由舉人同知漳州嘗發帑金葺
海艘繕築各汛營堡酌修造以飭戰艦精簡閱

以清什伍負海
寇符無竊發者

尹瑾

東莞人隆慶進士任漳司理每聽訟委曲開譬發
其天良民有泣下者獄有冤濫輒為平反當坐者

雖投榜笞不恨嘗命蒼頭於衙舍關畦蒔蔬政暇集
諸生教以行誼雖童孺訓誨不怠民名其坊曰甘棠

坊歷南太
僕少卿

范鳴謙

江陰人隆慶進士知龍溪邑有陷江虛懸米一
千六百餘石民苦賠累謙曰激水之下必有洄

洑之所繞生泥泊乃率邑丞躬詣築田沿坵丈畝得
六千四百畝又察諸詭沒者令歸戶以補懸糧士民

勒石
頌之

曾球

海陽人隆慶間知南靖邑西橋南田數十畝苗苦
旱球為鑿新渠以資灌溉又開濬城濠接引溪流

而東之墨場二
十四鄉俱賴焉

王穀

臨海人隆慶間以舉人知海澄邑初建即八都舊
堡為治土垣卑陋當道議城之穀承議派徵為均

閩邑丁糧充以八縣郵羨畫作暮程
細務必親逾年而城成民不知擾

周祚

新州人萬歷初以舉人知海澄邑新造難治祚闢荒招逋以甯戶口復為之覈賦清徭絕蠹食之弊

時舉鄉約保甲民俗丕變尋內召去

李載陽

新州人萬歷丁丑進士以南御史出守漳郡加意學校請復科舉舊額歲饑多方賑卹客兵夜

譁廉其渠魁置之法衆皆警服

羅拱辰

馬平人萬歷初同知漳州郡守羅青霄創咸鎮閣以興文事以拱辰有精思悉委成焉閣踞城

垣向因濠為基峻絕懸空拱辰取纊綆縛臺基樓櫓雉堞儼然而具量木入地若干尺四維支柱賴以無圯

陶拱聖

南昌人萬歷間由舉人任漳州同知苦節自持饘粥疏樵恂然寒素凡所措置躬自綜數擢知

延平府

曹澤

婺源人萬歷間判漳州司郡儲滌弊蠹絕苞苴三年清白一節卒於官貧無以斂輿隸編民咸賻助

馬

高從禮

字質甫仁和人萬歷丙戌進士分守漳南道廉介率屬毋令朘削民膏郡巨豪及諸惡少皆惴

惴屏息性精敏案無留牘以齋捧便道歸省卒於家閩人惜之

閔夢得

烏程人萬歷三十七年以進士知漳州寬平為政嘗均僧租以給民鬪泮池構書院與士子講

學論丈民立祠祀之

沈昌期

太倉人萬歷間知龍溪首革徵收頭目令民自行輸納察知奸僧藉口軍餉增租病民乃建議

官徵先完糧餉而後
給僧公私因之兩利

朱廷益

嘉興人萬歷間進士授漳浦令以文章飭吏治
先是召商行鹽房窠力爭罷之奸民更啗運司

欲藉鹽船出港行權廷益力言不便乃寢歲饑發庫
金募飢民修馬道全活萬計營事隳之檄通省為式

楊材

懷寧人萬歷間以進士令漳浦歲歉親覈貧民給
其食諸不便於民者力請蠲之始終以清白著

黃應舉

字弘選南海人萬歷間以進士知漳浦庭無留
訟民頌神君邑有擣菹者挾佳冶逍遙市門悉

禁革之嚴緝盜賊夜戶不
偏公餘崇獎士類有加禮

汪泗論

休寧人萬歷間以進士知漳浦革陋規庭訟不
喜加刑但以理遣而民自服有門清如水邑理

如家
之謹

陳震

字起元年十六襲漳州衛指揮同知署銅山所以勦海寇林鳳功擢巡撫中軍調小埕把總會大司

馬吳文華總督兩粵珠賊李茂盤據山海間文華疏薦震為北津把總調兵征勦連戰於放雞洋斜陽洋木蘭海浪濠海諸處大破之銜沈賊艘無算遂殪李茂殲其餘黨於清瀾港捷奏擢潤州遊擊賜金帛時議以潤州孤懸欲徙其民置內地震力持乃寢遂依島築城一方底定擢潯浯叅將以疾去震身長八尺慷慨談兵雅歌緩帶居然儒將風流

林棟隆

號栢菴鄞縣人萬曆末以進士授漳司理有大辟失入嗟歎良久為減一律家人航海來遇盜

詢知云此廉節推物相戒不敢犯高
船每假其封識以避盜歷陞少宰

施邦耀

字四明餘姚人天啓初知漳州會海寇劉香肆掠近城邦耀築萬松關起兩鎮炮臺募勇士出

其不意一鼓殲之民賴以寧又鋤豪強不法者人呼為施青天歷任巡海道素袍布被費橐蕭然後以憲

副殉國難

謚忠介

彭瑄

四川人崇禎辛未進士授漳司理署府篆驗庫日吏捧三百金以進曰此舊規也瑄曰今日革之後

有索之者則為新例矣遂却之陞御史值闖賊亂執至庭僚友問有商量否瑄曰有何商量惟死而已遂遇害

陳起龍

字念徐富陽人崇禎戊辰進士由御史出為漳南道副使先是知府施邦曜既去漳城宦僕及

鄭芝龍家兵恣甚起龍至一繩以法良善賴馬山寇徐連攻漳浦起龍親率兵禦之血戰累日城賴以全未幾卒漳人肖像祀之南橋

張天威

莆田人崇禎二年李魁奇犯海澄天威以把總奉檄往援賊斬賊酋數人賊遁去會漳浦告警

遊擊鄧世科以三矢趣天威天威枵腹宵馳數十里旦與賊遇矢絕無援力戰死同時守備吳兆燦亦與魁奇戰於龍溪伏發歿於陣中丞鄒維璉遣官致祭

國朝

許國楠

咸陽人順治三年隨師入漳奉貝勒命知漳浦時戎馬在郊徵輸百出國楠軍需克辦而民

不病未幾楊學皋以萬衆陰謀陷城變出叵測國楠義不辱赴井死

林蔚

合肥人順治四年以貢生知詔安次年賊陷縣城被挾見殺

陸大勳

漳浦營參將順治五年十一月初九日賊圍城偽帥盧若騰偽監軍邱建會逼屯西湖大勳出

城迎敵血
戰而死

楊佐

漳浦總兵順治六年七月佛潭橋寇據新城寨佐勦之力戰死

張國柱

漳浦雲霄營守將順治六年十一月海寇鄭成功陷雲霄國柱死之

傅永吉

益州人順治七年知長泰 鼎革初民弱兵強永吉善彈壁兵民相悅九年海寇圍城永吉下

令貧者登陴富者給餉晝夜履堞巡督砲如飛蝗不避也一日城將陷與守將王進率驍勇力戰弩弓殪其酋長三人賊乃却城賴以全永吉方射賊時中砲洞腹扶創歸已不可救矣氣垂絕猶連呼殺賊不止事聞贈按察使司僉事予祭廕建坊東闕塋銅鐘山

甘體垣

字仰之遼東人順治八年知海澄多所施設九年守將赫文興外叛汀以偽命不受強之瞑目

不食知不可屈沈之水邑人
招其魂祠於城隍廟左室

柳朝麟

順治九年授海澄城守至漳而邑為寇據留寓
郡城屢陳復澄之策當時以寇方求撫不納朝

麟嘆曰是狃我耳未幾千總劉國軒果延寇入城朝
麟聞之拊膺大慟曰任澄不能復其疆在漳安敢避

其難遂

自刎死

王顯謨

字裕如慈谿人隸籍天津由拔貢授河南歸德
理刑讞斷精明陞福建漳州府同知順治九年

鄭寇竊發督臣以顯謨威望素著率軍禦之與賊鬪
力盡赴水死事聞贈福建按察司副使賜祭葬

子元翰以廩
授武清縣丞

歐陽明憲

字章卿宿州人貢生順治十年知詔安時軍
興旁午郡議增築八旗營房解運防餉明憲

每事為民折減甲辰歲荒鄰境饒平開羅明憲力請
開禁繼之以泣得米數千石軍民賴焉先是環沙寇
猖獗明憲移檄饒鎮合兵搗之寇酋投首邑多竊盜
潛通諸寇者盡置之法自是盜失內應餘黨以平守
將劉進忠據潮州以叛會方用兵度不可與抗乃厚
結其父以制之進忠亦稍戢其濟變之才類此又築
縣城葺文廟考課諸生兵火中仍聞絃誦詔
人立碑銘德至今稱賢令者必曰猶見歐陽也

陳洪圖

字白書晉江人順治十年以舉人署詔安教諭
忠信力學所論率本濂洛關閩諸生春秋丁祀

捐俸備物時防海兵興督勸城工安軍措
餉洪圖多所贊益子遷鶴進士官翰林

蔣鈞

會稽人隨父任江西中順治丁酉科武舉授騰驤
衛千總陞福建海澄鎮中營守備會耿鄭二逆之

變陣亡

贈都司僉書
賜祭葬廕一子之濟

吳執中

字匪公山陰人正紅旗籍貢生順治十二年以僉事分守漳南時漳初附大兵雲集而飛輓

不至海寇逼郡民多遁去執中握算持籌還定安集師無飢馬濱海民許茂等首鼠兩端提督馬得功將盡屠之執中曰小民逼於寇患各自保其身家耳撫之皆吾民也且海澄廈門猶將諭其來降况近郊赤子乎得功大悟諸陷賊者聞之接踵未幾海澄納款以功陞山西副使祀名宦子興祚巡撫福建有父風而平海之功尤偉云

錢光泰

順天人順治十二年知漳州時郡城燬民皆野處光泰集流亡措兵餉日無寧晷漳平道多依

山嘗有虎患避虎者復病涉光泰經其地為捐金建橋焚林驅獸民稱曰馴暴橋

王玉璧

字楚珩仁和人武鄉試第一順治壬辰武會試復第一殿試第一甲第一名授福建都督僉事

時海寇屯漳攻泉州興化屬邑惠安同安告失而漳之南靖長泰漳浦詔安四縣先陷於賊玉璧復惠安同安解泉州圍隨從提督恢復漳城并四縣玉璧以諸邑淪陷勢不得已且漳城兵燹之餘傾廢已盡請免諸邑罪民以築城海寇突陷閩安鎮直逼省城巡撫宜永賁命玉璧偕撫標分頭堵禦帶兵不滿三百出奇苦戰用大砲打開賊木城於西城龍腰斬奪雲梯生擒賊首楊炯韓泰等賊遁去而城獲全陞陝西延綏定邊都督同知後調天津衛總兵致仕家居三十年年九十卒

洪鍾

字萬貞休寧人壬午舉人順治十五年知海澄時澄帥張甚暴卒日索餉而詳明鍾曰餉非緩

也吾將按籍而給如虛卒倒馬則柰何帥為少戢寇盜不敢犯曰洪公惠人也竟以軍興積勞而卒邑人如喪父母與前令甘體垣同祀

王三薦

湖廣人康熙二年以進士授漳司理性寬厚不事擊斷臬司責以舉劾三薦曰民困於下官疲

於上推官不忍為察察之行尋卒於官士民惜之

陳啓泰

字大來鑲紅旗貢生康熙三年任巡海道擊暴扶良奸宄屏息甲寅耿逆變起偽檄南下啓泰

密與海澄公黃梧謀拒守之策會梧病泰知事不可支間五日語其妻劉氏及女皆自縊妾婢二十餘口先後繼之屍縱橫枕藉啓泰次其尊卑從容引僚屬入視皆相顧失色汗下莫敢出聲啓泰慨然曰兒女子好義過於我公等勉之乃朝服望北再拜繫帛以死事聞贈資政大夫工部右侍郎謚忠毅廕其子

汝器

白拱薇

沔陽人順治壬辰進士康熙六年知南靖邑值水患諸村落多漂沒漫漶及學宮縣治拱薇悉

心弭患增葺賑濟皆出已橐卒成西河壩之功時征
役繁重民輒以田賤售豪弁而糧仍舊主或鬻男女
以償拱薇為除舊戶就田輸賦擇豪弁之桀黠
者首折辱之徭賦始均康熙五十二年祀名宦

黃道弘

淮安海州人鑲紅旗廩生康熙七年知詔安邑
濱海依山俗多頑梗道弘至任即修建申明旌

善二亭鼓厲其民并設義學擇師訓諭又以粵潮接
壤奸宄易滋多方設法以撫輯之民為賣刀買犢各
安本業歲旱禱雨立應斷悍獄片詞折服
時稱神明康熙十一年遷臨江府同知

趙象乾

山西高平人康熙八年以舉人知長泰首釐奸
胥匿賦之弊除飛詭米數百石逋累以清會有

大役郡奉憲檄立取民夫二千遲以軍法從事專差
督促象乾不應差促之迫象乾捧檄哭曰彈丸泰邑
安得立辦二千夫乎乃拉郡差赴東津同死百姓號
呼赴援當事聞之為罷役又嘗修紫陽祠設義學嚴

月課絃歌以興以疽發背卒
士民建祠於紫陽祠右祀之

黃芳度

平和人襲爵海澄公康熙十三年逆耿偽鄭變亂芳度密條機宜七疏俱為關吏所阻後以蠟

丸得達自明忍死圖存謀間耿鄭二賊事狀密旨褒獎乃傾家募兵為繕守計明年偽鄭悉眾圍漳城芳度使兄黃芳泰黃翰突圍入粵求援調遣將士分守四門屢出奇兵斬獲無數既而外援未至賊眾益聚芳度謂家人曰脫有不利當舉火自焚無為賊辱於是積火藥室中示將士以必死凡六閱月叛將吳淑等密降賊乘芳度登城巡北門乃開東門延賊入趨奪公府芳度入開元寺仰天哭拜曰叛將負臣臣謹以死報國遂投井死賊出戶嚮解之妻李氏亦自縊將士皆罵賊不屈無一降者事聞得旨追封王爵謚忠勇諭祭二壇李氏封王夫人遣官蓋造墻院牌坊世襲公爵同時殉難者黃樞黃芳名母汪

氏妻李氏黃芳聲及其弟芳祐母趙氏裨將蔡隆朱武陳騏張瓊陳猷戴璘黃香吳友俱奉 詔贈卹廕

子有 差

黃翼

平和人海澄公標左鎮都督僉事康熙十四年守漳海寇陷城血戰被執不屈死子廷珏胞兄端姪

明揚姪孫荅周暨女子婢妾四十八口同時殉難十六年 大師克復漳州 予褒贈遣官致祭 賜葬

金三百兩廕 長子衛千總

楊定國

山東人漳州守備康熙十四年海寇陷漳逼降不從支解之事聞 詔予贈卹

吳延貴

字子良奉天廕生康熙十六年任漳州同知十八年擢知本府時兵馬雲屯日需糧糗延貴首

請制府設立站運以給民食復出已橐安集難民先是海道陳啓泰殉難子汝器陷賊中延貴不惜重貲

購歸以軍功加一品
頂帶陞本省運使

傅弘基

金華人漳州城守遊擊分防長泰縣康熙十七年海寇圍縣城弘基嬰城固守援絕城陷被執

不屈死之事聞
優卹廕一子

魏明德

鑲藍旗排牙拉康熙十六年知龍溪旋調軍前十八年再任性寬簡遇事敢為時軍需夫役頃

刻難稽明德按籍均應豪右無所瞻徇軍士佔民房者請諸大帥立責退還士民賴之惜兩任縣事皆不及期其施為未竟云

張翼鵬

銀白旗筆帖式康熙十七年任巡海僉事當逆藩變後閩疆新復兵民雜處翼鵬請命督撫協

理定策會同郡縣運濟糧糈復請給兵房親為調度安置民得安堵汀屬永定全邑陷賊男婦離散翼鵬

力為安集復難民五千餘家而龍巖民苦轉輸謀且為變翼鵬單騎曉諭反側立消公餘與諸生考課經義風氣日上遷廣東分巡副使

蔣龍光

宜興人順治乙未進士康熙十九年任巡海僉事值海寇沸騰龍光設法固禦令井里自守官

兵駐集米價驟昂乃請總制姚啓聖檄江西運米協濟兵民交賴之啓聖平定金門廈門十七島龍光撫綏難民使復故業請弛海禁資民採捕往來駕舫樓船於定海間操練水師規取臺灣之計多所區畫尋遷浙江叅議兵民請留不可勒石於福州南臺以志遺愛

陳汝咸

字莘學鄞縣人康熙辛未進士三十五年以庶吉士出知漳浦邑賦役不均汝咸設法釐定奸

胥巨猾側目也而衰戶德之設義學四門朔望日會講五經性理綱目諸書新大成殿建銅山南溟書

院雲霄朱文公祠丁亥六月大水暴至病中聞報急披裘倚杖登南城募船結筏分拯溺者全活以千數在浦十三年如一日改調南靖民環擁不得行夜半單騎為選者服啓北門而去旋行取刑部主事陞大

理少
卿

阿琳

字玉山鑲藍旗廕生康熙四十年以副使任巡海汀漳道嚴重有威漳俗苦姦豪或恃強族或充練

總約正或為鄉長種種借名并兼琳曰此亦所謂豺狼當道也吾治之乃擇其尤黠者置之法次者榜其過惡於門使之愧悔姦豪斂戢尋陞貴州按察使累官太僕寺卿卒之日民思其澤康熙六十一年祀名宦

毛殿颺

字石亭博羅人康熙甲戌進士四十年知詔安時豪強恣橫盜賊公行殿颺一繩以法四境肅

然聽獄令自投審至則立判善催科不事鞭朴宿逋
一清有部使者至吏白當盛供帳殿颺曰吾聞部使
者甚賢騷動祇獲罪耳無為也除館舍戒僕夫
以待足矣尋調諸羅以勞卒詔安人至今思之



福建通志卷三十